

Sikũn Korĩt **Pawre wam Korĩt kãm Jejus kôt** **hkwỳjê hwỳr kagà nẽ mẽn h kôt** **kagà hõ mẽn**

Pawre na pre kagàja nhĩpêx. Kêp mry hkà ho ixkre nhĩpêx nẽ ho wênê ho pa xwỳnh na pre. Tã hpãnhã kêp Jejus nhỹ hã hkrajê jahkre ho pa xwỳnh. Jakamã na pre kagàja nhĩpêx nẽ Korĩt kãm mẽ kot Jejus kôt amnhĩ xunhwỳr xwỳnhjê hwỳr kumẽ. Na pre ra mẽ hwỳr wanta nhĩpêx nẽ kumẽ. Wam kagà nhĩxi pê Wam Korĩt. Tã axte hkôt ja nhĩpêx nẽ mẽ hwỳr mẽn jakamã kagà nhĩxi pê Sikũn Korĩt.

Na pre Korĩt kãm Jejus kôt mẽ htõjê hõ axtem nẽ nã puro kamã hpijaàm kêt o pa nhũm Pawre tee ri harẽn h ma nẽ mẽ hwỳr wam kagàta mẽ nẽ kamã tanhmã mẽ kot hipêx to hã mẽ kãm karõ. Tã kagà ja kamã axte tanhmã hã mẽ kãm karõ hto.

Na pre ra Korĩt wỳr mẽ kêp Kris nhỹ hã mẽ ahkre hã amnhĩ to hêx xwỳnhjaja mẽ hwỳr pøj nẽ tanhmã mẽ kãm kapêr jarẽn h to ho mẽ hkôt pa. Nẽ tanhmã mẽ kãm Pawre ho hêx to. Jakamã nhũm kagàja kamã tanhmã mẽ kãm amnhĩ tã àprãr to nẽ kãm mẽ hkĩnh tỳx ã amnhĩ jarẽ. ã na pre Pawre mẽ kãm mẽmoj jarẽn h nẽ hã kagà anê. Nẽ mẽ kãm hã kagà ho:

¹ Pa Korĩt kãm Tĩrtũm krajaja. Xà mẽ apiitã mẽ amex na ka mẽ apa? E ot pa mẽ awỳr kagà nhĩpêx nẽ kumẽ. Mẽ amã nẽ mẽ anhõ pika pê Gres kamã

Tîrtûm krajê mê mê ato ixpimrààtã mê awÿr hipêx nê kumê. Ixpê Pawre na pa hte Tîrtûm jamaxpêr xà hkôt ma Jejus Kris nhÿ hã krî piitã hkôt hkrajê jahkre ho ri ixpa. Tã Kris kôt mê pahtô Ximotre mê wa mê awÿr hipêx nê kumê.

² E kê Mêpahpãm Tîrtûm mê Pahihti Jejus Kris wa mê ato mex rãhã ho pa. Nê mêmoj to mê akutã nojarêt rãhã ho pa. Ka mê wa kukwak ri ajamakêtkati nê amex nê ri akînh nê apa ho apa.

Pawre kãm amnhÿ xà htÿx kamã hamak pyma hkêt ã harênh

Rômãn 1.11-12; Korosê 1.11; Sikûn Tesarôn 2.16

³⁻⁴ Nà Tîrtûm kêp mê panhõ Pahihti Jejus Kris nhÿpêxà na. Nê kêp Mêpahpãm maati jakamã na hte mê pakamã ukaprÿ nê tanhmã mê pahto mex to ho pa. Kot puj mê mêmoj tã tanhmã amnhÿ to nê pahkaprÿ nê ri papa nhÿm ja hã mê pahpumu hãmri nê hamaxpêr pix o akupÿm mê pahto mê paxihtÿx. Mêmo kaxyw na hte ã mê pahto mex anê? Nà mê pahte amnhÿ tã omunh nê amnhÿ pyrãk mê hkaprÿ nê ri mê pa xwÿnhjê jamaxpêr o hihtÿx o mê hkôt papa kaxyw. Ja kaxyw na hte mê pajamaxpêr o hihtÿx. Jakamã kwa pu mê kãm mex o mex ã mân harênh rãhã ho papa.

⁵ Na htem tõhã ixto Kris nhÿpêx pyrã nê tanhmã ixto pa amnhÿ xà htÿx kamã ijamak o ri ixpa. Tã nhÿm Tîrtûm inhÿpêx o te Kris nhÿpêx pyrã nê hamaxpêr pix o tanhmã ixkrã hto pa mê kutã amnhÿ to htÿx nê arÿ mê hkôt ixpa. ⁶⁻⁷ Na pa hte mê amã Kris kapêr jarênh o ixpa. Mê ate inhmar nê hkôt amnhÿ nhÿpêx kaxyw. Jakamã na hte mê kãm Tîrtûm kapêr mar prãm kêt xwÿnhjaja tõhã mê

atã ixtomnuj nẽ pa amnhĩ xà htỳx kamã ijamak o ri ixpa. Tã kwār mẽ māmri ã inhĩpêx anẽ. Mẽ ate Jejus kôt amnhĩ xunhwỳr tỳxja na inhmã hprãm. Na htem tanhmã Kris ã inhĩpêx to nhũm Tĩrtũm mẽ hã ixpumu nẽ tanhmã ixkrã hto pa inhmã amnhĩ xà htỳx kamã ijamak pyma hkêt nẽ ixpa. Nẽ arĩ mẽ hkôt mẽ kãm kapêr jarẽnh rãhã ho ri ixpa. Na hte Tĩrtũm amarĩ ã inhĩpêx anhỳr kêt nẽ. Mẽ ate ã kot inhĩpêx anhỳr ã ixpumunh nẽ ixpyrà nẽ amnhĩ kaxyw kãm ajamxpêr tỳx kaxyw na hte ã inhĩpêx anẽ. Mẽ ate ja hã ixpumunh nẽ ã ajamxpêr anhỳr kaxyw nẽ mẽ ajamxpêr o:

—Nà kot pa nhỹrmã Pawre pyrà nẽ tõhã mẽ mỳrapê amnhĩ xà htỳx kamã ijamak o ixpa. Hãmri nhũm Tĩrtũm ja hã ixpumu nẽ te ho Pawre nhĩpêx pyrà nẽ tanhmã ixto pa inhmã amnhĩ xà htỳx kamã ijamak pyma hkêt nẽ ixpa. Nà koja ã inhĩpêx anẽ.

Anhỳr o mẽ ajamxpêr kaxyw na hte Tĩrtũm mẽ kutã ixto ixihtỳx. Mẽ ate ja hã ixpumunh nẽ akupỹm tãm ajamxpêr pê Karõ nhỹ hã amnhĩ to axihtỳx kaxyw. Jakamã na pa tee ri mẽ akukamã ijamxpêr kêt nẽ.

Tĩrtũm kêp mẽ papyt`ar xwỳnh ã harẽnh

⁸ E Kris kôt ixkwỳjaja. Kot paj ixprĩ hã mẽ amã tanhmã amnhĩ jarẽnh to ka mẽ inhma. Na pa pre ma pika pê As wỳr mō nẽ mẽ kãm Jejus kapêr jarẽnh o ri mẽ hkôt ixpa. Hãmri nhũm mẽ hkwỳjaja ja hã ixtomnuj tỳx nẽ pa amnhĩ xà htỳx kamã ijamak pẽ mẽ hkôt ixpa. Kironhỹx pa pre mẽ kamã ty. ⁹ Na pa pre tee ri amnhĩ kukamã ijamxpêr o:

—Koja pēr mẽ xipĩ. Tanhmã kot pa we amnhĩ to nẽ tokyx mẽ kęp amnhĩ pytã? Kot paj tee ri inhmã mẽ kęp amnhĩptår prãm. Tĩrtũm pix na ja kaxyw mẽ kutã àhpumunh tỳx. Rỳ nhũm mẽ kot xipĩr tã nhũm kot akupỹm ixto ixtĩr kaxyw tapxipix na àhpumunh tỳx. Nà kot paj amnhĩ kaxyw tapxipix mã mãn ijamaxpēr o ri ixpa nhũm amnhĩ tã ixpumu nẽ hkĩnh nẽ. ã ixte amnhĩ nhĩpêx anhỹr o ixpaja na kãm hprãm. Anẽ.

¹⁰ Tã nhũm pre ã inhĩpêx anẽ nẽ xatã mẽ kęp ixpytår o ixkõt pa. Koja ã mẽ kęp inhĩpêx anhỹr rãhã ho pa. Nà ã kot inhĩpêx anhỹr mã kênã.

¹¹ Nom kwa kêt ka mẽ apiitã arĩ ixto Tĩrtũm wỳr rãhã ho ri apa kê mẽ ama nẽ mẽ kãm ixkurê xwỳnhjê kutã ixto ixihitỳx rãhã ho pa. Nẽ ixto mex rãhã nẽ. Hãmri nhũm mẽ ohtõ nẽ kot mẽ kęp tanhmã ixpytår to hã ixtã omu nẽ ixtã kãm mex o mex ã harẽ.

*Pawre kot mẽ kãm amnhĩ tã aprãr ã harẽnh
Wam Korît 2.1-5*

¹² Nẽ na xep pre atar Kris kõt mẽ pahkwỳjaja tanhmã ixto kapēr punuj to nẽ Jesus kot mẽ awỳr inhmẽnh kêt ã mẽ amã ixto hêx. Nẽ ijakwa nhĩkjê ho inhmã mẽ akĩnh nẽ ijakwa nhĩkjê ho mẽ ato ixkapēr punuj ã ijarẽnh o ri pa. Nom ixte ã amnhĩ nhĩpêx anhỹr kêt. Aa ixte tanhmã mẽ ano kupyrr to hkêt. ãm hãmri na pa mẽ amã amnhĩ jarẽ nẽ tãm mẽ amã ixkapēr o ri ixpa nẽ tãm ri mẽ anhĩpêx o ri ixpa. No ijamaxpēr tũm kõt tanhmã mẽ anhĩpêx to hkêt nẽ. ãm Tĩrtũm kot mẽmoj to mẽ pakutã nojarêt ã omunh xà hkõt pix mã na pa hte ỹ hã mẽ ato mex o ri ixpa. Ijamaxpēr nyw o. Na pa

hte Tirtüm pyrà nê mẽ piitã mẽ ho mex nê. No mẽ kajaja ixpyràn mẽ apê hkra jakamã na pa hte mẽ ato mex kumrêx o ri ixpa. ¹³ Na pa hte mẽ amã kagà hkwy nhîpêx nê ixprî hã mẽ amã tanhmã mẽmoj jarênh to. Mẽ ate kamã harênh nê mar mex kurê kumrêx kaxyw. No na pa hte mẽ amã tanhmã ixêx to rý tanhmã mẽ ano kupyw to hkêt nê. ¹⁴ ã ixte amnhî nhîpêx anhÿr o ri ixpa htã kormã mẽ apiitã ja hã ixpumunh mex kêt nê. Nê Jejus kot mẽ awÿr inhmênh ã ixpumunh mex kêt nê. Jakamã na hte mẽ akwÿjaja ixto akapêr punuj o pa. Tã kot kaj mẽ nhÿrmã ãm hãmri Jejus kot mẽ awÿr inhmênh ã axpên mã ijarê pa mẽ ama nê ixkînh nê. Hãmri nhÿm nhÿrmã mẽ panhõ Pahihti Jejus mẽ pahwÿr akupÿn wrÿ pa kãm mẽ ajarê nê kãm:

—E Pahihti. Jajê mã na pa pre akapêr jarênh o ixpa nhÿm mẽ inhma nê akôt amnhî xunhwÿr kurê kumrêx nê tãm amnhî nhîpêx mex o pa.

Anhÿr o kãm mẽ ajarê. Hãmri nê ã mẽ ate amnhî nhîpêx anhÿr ã mẽ apumunh kôt ixkînh nê. Ka mẽ ajaxwÿja akînh pê tanhmã kãm ijarênh to ho akuhê.

Pawre hêx kêt ã kot amnhî jarênh

Wam Korît 16.5-6

¹⁵⁻¹⁶ Nê na pa pre ra mẽ awÿr ixkrà. Ixte ma mẽ awÿr inhmôr nhÿm mẽ ate ixpumunh nê akînh ã mẽ akamnhîx nê mẽ awÿr ixkrà nê ijamaxpêr o:

—Nà ma Masetôn wÿr inhmôr xwÿj ri kot paj ma Korît kumrêx wÿr mō. Hãmri nê Kris kôt ixkwÿjê pumu nê rî kormã hamũ Masetôn wÿr mō. Nê mẽ kamã ri ixpa tãmtã awjanã nê akupÿn Korît wÿr mō nê axte mẽ omu. Jao Tirtüm kapêr o mẽ ahkre

ho axkrut nhũm mẽ amnhĩ tã ixpumu nẽ hkĩnh nẽ. Hãmri pa akupỹm Jutej wỳr inhnojarêť nhũm mẽ pry hã ixàpkur xà hã inhmã mẽmoj kwỳ nhõr japêr.

Anhỹr o ijamaxpêr. ¹⁷ Tã kormã jar tanhmã amnhĩ nhĩpêx to ho ixpa ka xep mẽ tee ri amnhĩ wỳr ixkãm ama nẽ axpên mã ijarênh o:

—Kwa Pawre kot ra mẽ pahwỳr nojarêť ã amnhĩ jarênh tã amnhĩm nojarêť kêt kumrêx. Mãn pre ãm mẽ pamã amnhĩ to hêx nà? Ra kot mẽ pamã amnhĩ jarênh tã tokyx hpôx kêtre hã. Anẽ.

¹⁸ Kwa mẽ ri ã inhmã ajamaxpêr anhỹr kêt nẽ. Na pa pre mẽ amã ixêx kêt nẽ. Na pa hte Tĩrtũm noo mã ãm hãmri mẽmoj jarênh o ri ixpa nẽ mẽ amã mẽmoj jarênh o ixêx kêt nẽ. Nà ãm hãmri na pa pre ma mẽ awỳr inhmõr ã amnhĩ jarê.

¹⁹ Na pa pre ra Ximotre mẽ Siras mẽ wa mẽ amã Jejus Kris jarênh o ri mẽ akôt ixpa. Jejus kêp Tĩrtũm Kra hã harẽ nẽ kot amnhĩ nhĩpêx te kot Tĩrtũm kot amnhĩ nhĩpêx pyræk ã harênh o ri ixpa. Jejus haxwỳja amnhĩ to hêx kêt. Kot mẽmoj tã amnhĩ jarênh xà hkôt na hte ãm hãmri tanhmã amnhĩ nhĩpêx to. Tã ã kot amnhĩ nhĩpêx anhỹrja kôt na pa inhmã ixte amnhĩ nhĩpêx o ixpa hprãm nẽ. ²⁰ Ra Tĩrtũm Jejus Kris kukwak ri kot mẽ pahto mex ã amnhĩ jarênh jakamã na pu htem axpên mã harênh o:

—Koja Tĩrtũm Jejus kukwak ri mẽ pahto mex rax nẽ. Ra kot mẽ pahtã amnhĩ jarênh xà hkôt. Nà Tĩrtũm mex o mex. Anẽ.

*Tĩrtũm kot mẽ pa hwỳr Karõ rênh ã harênh
Rõmãn 8.14; Epes 1.13*

21 Nà Tīrtūmjā mex o mex. Kot mẽ pahpê hkra kaxyw amnhīm mẽ paxunhwýr jakamã na hte tanhmã mẽ pahkrã hto pu mẽ Kris kôt amnhĩ nhĩpêx mex o papa.

22 Na pu htem Kris kôt amnhĩ xunhwý nhũm Tīrtūm ja hã mẽ pahpumu nẽ mẽ pahwýr Karō rē nhũm mẽ pahwýr agjê. Mẽ piitã mẽ kot mẽ pahpê hkra hã mẽ pahpumunh kaxyw. Te mẽ kot tanhmã mẽ hikukrêx kagà hto nhũm mẽ kot kêp õ dõn ã omunhta pyræk. Tã koja Tīrtūm Karō mẽ pakamã hkrĩ pu mẽ ja hã amnhĩ pumunh kôt Tīrtūm kot nhỹrmã mẽ pahto mex rax ã amnhĩ tã omunh kurê kumrêx. Ra kot mẽ pahto mex tã koja nhỹrmã mẽ pahto mex rax o wam kot mẽ pahto mex raxta jakre.

Pawre kãm mẽ kãm àkjêr prãm kêt ã kot amnhĩ jarênh

Wam Korīt 4.21; Sikūn Korīt 10.1-2

23 E Kris kôt ixtõ nẽ ixtõxjaja. Kot paj kormã ma mẽ awýr inhmõr kêt ri ixprĩ hã mẽ amã tanhmã amnhĩ jarênh to ka mẽ ixte amnhĩ jarênh ma. Tīrtūm tãm mẽ arom kot ijamaxpêr kôt ixpumunh mex jakamã kot paj noo mã ixprĩ hã mẽ amã tanhmã amnhĩ jarênh to ka mẽ inhma.

Na pa pre ra mẽ awýr inhnojarêt tã no ãm tee ri amnhĩ kukamã ijamaxpêr nẽ ijamaxpêr o:

—Nà kot paj taxy kormã ma mẽ hwýr inhmõr kêt nẽ. Kot paj tokyx mẽ hwýr mõn pøj nẽ kot amnhĩ tomnuj xwýnhta ã mẽ kãm akir nẽ nẽ tanhmã mẽ kãm ixkapêr to. Hãmri nhũm mẽ amnhĩ tã inhma nẽ hkaprĩ nẽ tee ri amnhĩ kukamã hamaxpêr. ã

mē kot amnhĩ nhĩpêx anhỹr pymaj kot paj kormã mē hwỳr inhmõr kêt nē.

Anhỹr o ijamaxpēr. ²⁴ Inhmã ma mē awỳr inhmõr nē tanhmã mē ate amnhĩ nhĩpêx to hã axte mē amã karõ kamã ixihỳx prãm kêt. Mē akwỳjê rom ra mē ate Kris hkõt amnhĩ xunhwỳr tỳx kênã. Tã mē ate hkõt amnhĩ nhĩpêx mex o akĩnh nē apaja na inhmã hprãm.

2

¹ Na pa pre ma mē awỳr mō nē mēmoj tã mē amã akir nē nē tanhmã mē amã ixkapēr to ka prem inhma nē akaprĩ nē ri apa. Tã inhmã akupỳm mē awỳr inhmõr nē axte mē amã ixàkjêr prãm kêt jakamã na pa kormã mē awỳr inhmõr kêt nē. ² Kot kaj mē akĩnh nē apa pa ijaxwỳja ixkĩnh nē ixpa. No kot paj ma mē awỳr mō nē mēmoj tã mē amã akir ka mē tee ri inhma nē akaprĩ nē. Pa mē apumu nē ijaxwỳja ixkaprĩ nē.

³ Ja pymaj na pa pre wam ixte mē awỳr kagà mēnh̄ta kamã mēmoj nē tanhmã mē amã ixàkjêr to. Mē ate kamã harēnh nē mar nē tokyx kormã mē awỳr inhmõr xwỳj ri tanhmã mē ate amnhĩ tomnuj tota kaga nē tãm amnhĩ nhĩpêx kaxyw. Kêr pa mēmo arĩgro hã ma mē awỳr mōn pōj nē mē ate tãm amnhĩ nhĩpêx o apa hã mē apumu nē ixkaprĩ hkêt nē ixkĩnh nē. Ka mē ajaxwỳja ixpumu nē akĩnh nē. ⁴ Jakamã na pa pre ã mē amã kagàta nhĩpêx nē mē awỳr mēnh̄ anē. Nē kamã mēmojta nē tanhmã mē amã ixàkjêr to. Na pa pre ixkaprĩ htỳx nē tee ri mē akukamã ijamaxpēr o inhmỳr rax pē mē amã mēmojta ã kagà. No ãm mē akaprĩ kaxyw

na pa pre mẽ amã hipêx kêt nê. ãm mẽ ate kamã harênh nê inhmar nê ajamxpêr o:

—Hêxta waa nê. Nà Pawre na kãm mẽ pahkĩnh tỳx kumrêx. Hã na pre mẽ pahte tanhmã amnhĩ tomnuj to hã mẽ pajarênh ma nê tee ri mẽ pakukamã hamxpêr pê kagàja kamã hã mẽ pamã akir nê mẽ pahwỳr kumê. Nà kãm mẽ pahkĩnh tỳx kãm na ã mẽ pamã kapêr kãm hihtỳx anê.

Anhỳr o ajamxpêr kaxyw na pa pre hipêx nê mẽ awỳr kumê.

Mẽ kot axte amnhĩ tomnuj mã hamxpêr kêt ã mẽ kãm karõ

Rukre 17.3-4; Wam Korit 5.1-13; Karatas 6.1-2

⁵⁻⁹ Nê wam kagàta kamã na pa pre mẽ amã mẽ akwỳjê hõ kot nã kaàkre kamã hpijaàm kêêta pa mẽ amã tanhmã hã karõ hto. Ra mẽ ate harênh mar tã nê kãm akapêr kêt nê. Tã mẽ ate inhmar nê nê tanhmã kãm akapêr to nê amnhĩ nê hanor kaxyw na pa pre mẽ awỳr kagàja mẽ. Hãmri nê ijamxpêr o:

—Ko. Kojã mẽ ixkapêr mar xà hkõt amnhĩ nê hanor japêr. Anê.

Tã ka xep prem kamã harê nê ama nê tee ri ja hã amnhĩ pumu nê akaprĩ nê. Nê ixpyrà nê apijaàm nê. Hãmri nê ijamxpêr xà hkõt amnhĩ nê hanor kãm axihtỳx nê. ãm hãmri na ka prem ã hipêx anê. Nhũm xep tee ri ja hã amnhĩ pumu nê hkaprĩ nê hkaprĩ xàj ri mỳr o pa. Jao ra ã amnhĩ nhĩpêx anhỳrta kaga nê akupỳm tãm amnhĩ nhĩpêx. Tã ra ã kot amnhĩ nhĩpêx anhỳr jakamã kwa mẽ tokyx akupỳm amnhĩ wỳr awỳ kê axte mẽ awỳr mra nê mẽ akõt pa. Ra kot amnhĩ tomnujta kaga jakamã kêr ka mẽ axte kãm ajamxpêr kêt nê. Akupỳm

tãm kãm akapêr kê tokyx akupÿm tãm hamaxpêr nê hkĩnh nê pa. Kot kaj mẽ tokyx ã hipêx anhÿr kêt nê nhũm tee ri amnhĩ kukamã hamaxpêr nê hkaprĩ nê pa. Ja pymaj kwa mẽ amã hkĩnh ã kãm amnhĩ jarê nê akupÿm tãm kãm akapêr pê tãm hipêx o ri apa. Kê amnhĩ tã mẽ apumu nê akupÿm hkĩnh nê tãm hamaxpêr. ¹⁰ E kêr ka mẽ axte kot tanhmã amnhĩ tomnuj tota mã ajamaxpêr kêt nê. Kwarĩ ho kwarĩ. Kot kaj mẽ ã hipêx anê pa ijaxwÿja ma hipêx anê. No pa na pre tanhmã ixtomnuj to hkêt nê. ãm Jejus kapêr kwÿm na pre ri ã amnhĩ nhĩpêx anê. Tã ra kot amnhĩ tomnujta kaga jakamã kot paj Jejus nhÿ hã akupÿm tãm hipêx nê kot amnhĩ tomnujta o ijamakêtkati tokyx anê nê axte kãm ijamaxpêr kêt nê. Mẽ apiitã mẽ amex nê ri mẽ apa kaxyw. Jakamã kêr ka mẽ ajaxwÿja mẽ amex nê apa kaxyw ã amnhĩ nhĩpêx anê nê axte kãm ajamaxpêr kêt nê. ¹¹ Kwa mẽ tokyx ja ho ajamakêtkati. Kê Satanasti tee ri ja hã mẽ apumu nê mẽ amã mẽ ate tanhmã amnhĩ tomnuj to hprãm xàj tee ri tanhmã ri mẽ ato ho pa kaprÿ. Kêr pu mẽ Satanasti kot amnhĩ nhĩpêx kôt amnhĩ nhĩpêx o ri papa hkêt nê. Ra mẽ pahte Tĩrtũm kapêr kuhpa hã tanhmã kot amnhĩ nhĩpêx to ho pa hã omunh mex kênã.

Pawre kot Xitre japêr o pa hã harênh

¹² Nê na pa pre ja rũm ixkato nê ma Tôx wÿr mō. Ixte mẽ kãm Kris jarênh o mẽ hkôt ixpa kaxyw ma mẽ hwÿr mō. Nhũm Pahihti Kris ixkukamã tanhmã mẽ hkrã hto jakamã pa pre mẽ hwÿr pōj nhũm mẽ piitã kãm ixujarênh mar prãm nê. Pa pre mẽ kãm Tĩrtũm kapêr jarênh rÿy ho mẽ hkôt

ixpa. ¹³ Na pa pre Xitre ra mẽ hwỳr ixkukamã hpôx ã hkamnhĩx tã nhỹri omunh kêt nẽ. Hãmri nẽ ijamaxpěr o:

—Hêxta waa nẽ. Inhmã Korîť kãm Jejus kwỳjê jarênh mar prãm. Na pa tee ri mẽ hkukamã ijamaxpěr o ixpa. Nom kormã Xitre mẽ kurũm akupỹn hpôx kêt. Mãn kormã Masetõn kamã pa.

Anhỹr o ijamaxpěr hãmri nẽ mẽ kãm amnhĩ jarê nẽ ixkato nẽ ma Masetõn wỳr krĩ hkwỳ hkôt hapêr o mỗ. Tã ra hwỳr ixkato nẽ omu.

*Te mẽ pahpê mẽhkuxwa xà pyræk ã mẽ pajarênh
Epes 5.2; Pìripos 4.18*

¹⁴⁻¹⁶ Nà Tĩrtũmjia mex o mex. Na hte mẽ pahto mex rãhã ho pa. Nẽ mẽ kot mẽ panê àmnàr xwỳnhjaja nhũm hte tanhmã mẽ ho pu mẽ ma paxàmnhĩx ri mẽ hkôt mẽ kãm Kris kapêr jarênh o ri papa. Te mẽ pahte mẽ hkuxwa xà ho ri mẽ hkuxwa ho papa pyræk. Mẽ pahte Kris kôt amnhĩ nhĩpêx jakamã Tĩrtũm mã te mẽ pahkuxware nẽ ri mẽ papa pyræk. Nẽ te mẽ kãm Kris jarênh o ri papa pê te mẽ hkuxwa xà ho mẽ hkuxwa ho ri mẽ hkôt papa pyræk. Nhũm hte mẽ hkwỳjaja mẽ pama nẽ kãm mar prãm nẽ. Nẽ mẽ paxujarênhja haxwỳja te kot mẽ hkuxwa xà kuxwa mex nhũm htem hpār nẽ kãm ho amnhĩ kuxwa hprãm pyræk. Jao kãm mẽ pamar prãm nẽ Kris kôt amnhĩ xunhwỳ. No nhũm mẽ hkwỳjaja axtem nẽ mẽ kêp mẽ pamar prãm nōkati. Mẽ kumã Tĩrtũm kapêrja te kêp wenên kuxỳ htỳx nhũm mẽ kot hpār nẽ htyk pymaj amỳm kuhê pyræk. Jao kapêr kaga nẽ kêp amỳm amnhĩ xunhwỳ.

Ně na pu htem amnhĩ krã hkôt mẽ kãm Kris kapěr jarěnh o ri papa hkêt ně. Ām Tĩrtũm nhỹ hã pix mã tanhmã harěnh to ho papa.

Pawre kot katàt kôt Tĩrtũm kapěr o mẽ ahkre hã harěnh

¹⁷ Na hte mẽ kot mẽ kêp Kris nhỹ hã mẽ ahkre hã amnhĩ to hêx xwỳnhjaja te Tĩrtũm kapěr o wěnhê pyrãk o mẽ hkôt pa. Jao kàxpore hprãm xàj amnhĩ krã hkôt tanhmã mẽ kãm harěnh to nhũm htem mẽ kuma ně hpãnhã tanhmã mẽ kãm amnhĩrer to. Nom pa na pa hte ã amnhĩ nhĩpêx anhỹr kêt ně. Ně mẽ uràk ně amnhĩ krã hkôt Tĩrtũm kapěr jahkre ho ixpa hkêt ně. Tĩrtũm kot mẽ akaxyw ixãm jakamã na pa hte ixkatàt kôt Kris nhỹ hã amarĩ mẽ amã kapěr jarěnh o ri mẽ akôt ixpa. No mẽ uràk ně kàxpore prãm xàj mẽ amã harěnh kêt ně. Tĩrtũm kot ja hã ixpumunh mex.

3

¹ Mẽ kêp Kris nhỹ hã mẽ ahkre hã amnhĩ to hêx xwỳnhjaja na htem nhỹhỹm nojarêt ně mẽ kot mar xwỳnhjê mã:

—E kot paj ma nhãm krĩ hõ hwỳr mỗ ně Tĩrtũm kapěr o mẽ ahkre. Jakamã kwa mẽ kaxyw inhmã kagà nhĩpêx ně kamã ixte Tĩrtũm kapěr o mẽ ajahkre mex xwỳnh ã ijarě ně hã kagà. Hãmri ně inhmã agõ pa ma amnhĩ kôt o mỗ ně mẽ kot inhmar mã xwỳnhjê mã kugõ kê mẽ kamã harě ně ijarěnh ma ně kãm ixkapěr mar prãm ně.

Anhỹr o na htem amnhĩ to mẽ hwỳr o pa. No pa na inhmã ã amnhĩ nhĩpêx anhỹr prãm kêt. Inhmã nhãm mẽ kãm amnhĩ to jarkrar prãm kêt. Mẽ ate ja hã ixpumunh mex. Ra mẽ piitã mẽ kot ixkatàt

kôt ixte Tĩrtũm kapẽr jarẽnh mex ã ixpumunh mex jakamã mo kaxyw kot pa ri amnhĩ kôt kagà jamy nẽ ho ixpa? Nà kot pa amnhĩ kôt hõ ho inhmõr kaxyw hã ixàhwỳr kêt nẽ. ²⁻³ Mẽ kajaja te mẽ apê inhõ kagà pyràk. Na ka prem ixte mẽ ajahkre ma nẽ Jejus kôt amnhĩ xunhwỳr kurê kumrẽx. Hãmri nhũm Tĩrtũm mẽ amã amnhĩ Karõ rẽ nhũm mẽ amã agjê ka mẽ ÿ hã amnhĩ nhĩpêx nyw o amnhĩ nhĩpêx o apa. Hãmri nhũm mẽ akwỳjaja amnhĩ jaêr pê mẽ ate amnhĩ nhĩpêx nyw ã mẽ apumu nẽ mẽ atã xypên mã ijarẽnh o:

—Hêxta waa nẽ. Pẽr ãm hãmri na pre Kris mẽ hwỳr Pawre mẽ. Na pre ma mẽ hwỳr mõ nẽ mẽ kãm Tĩrtũm kapẽr o mẽ ahkre nhũm mẽ kuma nẽ amnhĩ tomnuj kaga hpa nẽ hpãnhã Tĩrtũm kapẽr kôt amnhĩ nhĩpêx nẽ tãm ri amnhĩ nhĩpêx o pa. ãm hãmri na hte Pawre mẽ ahkre mex o pa. Hêxta waa nẽ.

Anhỳr o mẽ atã ijarẽnh jakamã mo kaxyw kot pa kagà hkwy jamy nẽ amnhĩ kôt ho ixpa? Nà mẽ kajaja te mẽ apê inhõ kagà pyràk.

⁴ Na pa pre Jejus kôt amnhĩ xãm nhũm Tĩrtũm ja hã ixpumu nẽ tanhmã inhmã kapẽr o amnhĩrit to nẽ inhmã:

—E Pawre. Kêr ka ma mẽ kãm ixkapẽr jarẽnh o ri mẽ hkôt apa.

Anhỳr jakamã na pa hte Tĩrtũm kamnàr rom ã amnhĩ nhĩpêx anhỳr o ri mẽ hkôt ixpa. ⁵ Nom amnhĩ krã hkôt mẽ ahkre hkêt nẽ. Tanhmã kot pa we amnhĩ to nẽ amnhĩ krã hkôt mẽ kãm kapẽr o mẽ ahkre mex nẽ? Nà Tĩrtũm pix na hte ja kaxyw tanhmã ixkrã hto pa ô ri mẽ ahkre ho ri ixpa.

Tĩrtũm kapẽr nyw jarẽnh

⁶ Nê Tîrtûm na hte tanhmã ixkrã hto pa Karõ nhỹ hã mẽ piitã mẽ kãm kapêr nyw jarênh o ri ixpa. Amnepêm Tîrtûm kot Ijaew mã mẽmoj tã karõ xwýnhta. Mojes kot kapêr tûm jarênh o pa xwýnhta mex tã no nhũm mẽ tee ri hkôt kãm amnhĩ nhĩpêx prãm o pa. Nê xatã kamã harê nê omunh tã tee ri kot hkôt kãm amnhĩ nhĩpêx prãm. Tã mẽ kot hkôt amnhĩ nhĩpêx kêt mýrapê na prem pikaprâr pan hapêx. No kêt Tîrtûm kapêr nywja. Jejus jarênhja. Na hte Tîrtûm Karõ tanhmã mẽ pahkrã hto pu mẽ Jejus kôt amnhĩ nhĩpêx o ri papa. Jao mẽ pahpê pahťir tûm nê papa mã xwýnh. No na hte nhãm mẽ hkwyjaja kãm harênhja mar prãm kêt nê amnhĩ jarênh o:

—Nà kot paj amnhĩ krã hkôt ã amnhĩ nhĩpêx anê nê ã amnhĩ nhĩpêx anê nhũm Tîrtûm ja hã ixpumu nê ixtîr tûm nê ixpa mã xwýnh ã ijarê.

Anhỹr tã no ãm ã amnhĩ jarênh anhỹr kapry. Tîrtûm Karõ nhỹ hã mẽ kot amnhĩ to mex o mẽ pa xwýnh pixjaja koja mẽ htîr tûm nê pa ho pa.

⁷ Nê Tîrtûm kapêr tûmta na pre Mojes mẽ kãm harênh kaxyw nhũm mẽmoj tanhmã amnhĩ nhĩpêx to rax kumrêx. Naja hkrakrak nê haxênh nê kamã kamàt kô htyk. Hãmri nhũm Tîrtûm mẽ kot hkôt amnhĩ nhĩpêx kaxyw kên po hã mẽ kãm mẽmoj tã karõ nhũm Mojes kumy nê mẽ hwýr o wrý nê mẽ kãm kamã harê. Tîrtûm kot hirã htýx kamã kãm kapêr nhũm kuri mar o ãm jakamã uràk nê ý hã hkuk nhĩrã htýx kumrêx nê mẽ kãm kapêr jarênh o xa. Jakamã nhũm mẽ tee ri kot hprĩ hã omunh mex kaxyw no ãm nom gêk týt nê. Tã gaa nhũm hkuk kãm hirãja amnhĩm hprĩ nê hapêx o mō. Na pre ã Tîrtûm Ijaewjê mã kapêr tûm nhõr anê. Hãmri

nhùm Mojesja ô ri mẽ kãm kamã harẽ nẽ harẽnh pa hãmri nẽ mẽ kãm:

—E kêr ka mẽ Tirtũm kapêr mar tỳx nẽ hkôt amnhĩ nhĩpêx mex rãhã ho ri apa. Kêr ka mẽ nhỹrmã atyk tã kê akupỹm mẽ ato mẽ atĩr ka mẽ õ krĩ kamã kuri atĩr tũm nẽ amex nẽ apa ho apa. Anẽ.

Hãmri nhùm mẽ kuma nẽ kãm:

—Tôe. Nà kot paj mẽ hkôt pix mã ri amnhĩ nhĩpêx mex rãhã ho ri ixpa.

Anhỹr ã amnhĩ jarẽnh tã no ãm hkôt amnhĩ nhĩpêx kêt nẽ nhùm Mojes tee ri mẽ kot amnhĩ nhĩpêx ã mẽ omu nẽ mẽ kãm:

—Nà mẽ ate Tirtũm kapêr kôt amnhĩ nhĩpêx kêt jakamã kot kaj mẽ nhỹrmã ty nẽ Tirtũm pẽ awry rax kumrêx nẽ ri apa. Anẽ.

⁸ Tã na hte Tirtũm jarãhã axtem tanhmã mẽ pamã kapêr to. Pãnhã kapêr nyw o kapêr nẽ mẽ pamã:

—Kot kaj mẽ Ixkra Jejus kôt amnhĩ xunhwỳ pa hã mẽ apumu nẽ mẽ ato ixkra. Hãmri nhùm Ixkarõ mẽ amã agjê. Anẽ.

Kapêr ja na mex kumrêx o kot kapêr tũm jakrenh. ⁹ Kapêr tũmja mex tã nhùm htem hkôt amnhĩ nhĩpêx kêt nẽ. Jakamã na htem ty nẽ Tirtũm pẽ awry rax ã ri pa. No kapêr nywja na tũmta rom mex o mex. Na hte Tirtũm mẽ pamã kapêr nywja jarẽnh o:

—Kot paj tanhmã mẽ akrã hto ka mẽ amnhĩ to mex pix o ri apa. Jao ixkôt ri amnhĩ nhĩpêx mex o ri apa. Anẽ.

¹⁰ Nẽ kapêr tũmja te kot kanê hpôk kryre pyræk. No kapêr nywja mex o kot tũm jakrenh jakamã te

kot mẽmo hpôk rũnh o kanê hpôk kryre jakrenh pyræk. Jakamã nhũm mẽ kot hirã rax kãm ri mrar gryk ã hpôk grire nhĩrã kamã mrar kêt pyræk. ¹¹ Tĩrtũm kapêr tũm te kot Mojes kuk pyræk. Na pre kamã hirã rax tã gaa nê amnhĩm hprĩ nê kamã hirã hapêx o mõi. Nê gaa nê hapêx. No kêt Tĩrtũm kapêr nywja te kot Tĩrtũm nhĩrã htỳx rãhã ho rãhãta pyræk. Koja uræk nê aa hapêx kêt kumrêx.

Ijaewjê jarênh

Rômãn 11.7-10

¹² Nê Tĩrtũm kapêr nywja mex o mex jakamã na pa hte ixàmnhĩx mẽ kãm harênh o ri ixpa. ¹³ Te ixte Mojes kot amnhĩ nhĩpêx pyræk kêt. Na pre hte Mojes ixkĩnhã àmnhĩx Ijaewjê mã Tĩrtũm kapêr jarênh o ri pa hkêt nê. Mẽ kot hkuk kãm hirãta ra hapêx o mõi ã omunh nhũm hpijaàm pymaj na pre kupêxê puroore ho amnhĩ kuk pro nê ri mẽ hkôt pa. ¹⁴ Jakamã nhũm prem hprĩ hã hkuk kãm hirã pumunh mex kêt nê. Nê Tĩrtũm kapêr ã kagà htũmja nhũm prem mãânên hprĩ hã mar mex kêt nê. Mẽ hkrã hihtỳx jakamã te mẽ kot amnhĩ jamak pro nê mẽmoj mar mex kêt pyræk jakamã mẽ kot mar tã hprĩ hã mar kêt nê. Nê hkôt ri amnhĩ nhĩpêx mex kêt nê. No mẽ kot Kris kôt amnhĩ xunhwỳr xwỳnhjaja na hte Tĩrtũm amnhĩ tã mẽ omu nê te mẽ nê mẽ hamak hpro xãta rênh par nê rênh pyræk o mẽ hipêx nhũm mẽhprĩ hã kapêr mar tỳx nê.

¹⁵ Tã na hte Ijaewjaja arĩ jarãhã Mojes kot Tĩrtũm kapêr ã kagà htũm kamã harênh o pa. Nom arĩ mẽ hkrã hihtỳx jakamã te mẽ kot amnhĩ jamak pro nê kamã harênh o pa pyræk o amnhĩ nhĩpêx jakamã kormã hprĩ hã mar kêt nê. ¹⁶ Tã koja mẽ hkwỳjaja

Pahihti Jejus Kris kôt amnhĩ xunhwỳ nhũm amnhĩ tã omu nẽ te kot mẽ hamak nê hpro xà hpyr nẽ mēnh pyrək o mẽ hipêx nhũm mēhprĩ hã kapēr nyw mar tỳx nẽ. ¹⁷ Pahihti mẽ Karōja wa htipxi jakamã na hte mẽ pakamã agjê nẽ hprĩ hã mẽ pamã kapēr o amnhĩrĩt o pa. ¹⁸ Ra mẽ pahte Pahihti Kris kôt amnhĩ xunhwỳr jakamã te mẽ pahte mẽ kot amnhĩ jamak pro xwỳnh kot amnhĩ nhĩpêx pyrək kêt. Nhũm Pahihti Karōja tanhmã mẽ panhĩpêx to pu mẽ ra hkôt amnhĩ nhĩpêx mex o mō. Jakamã na htem mẽ pahte amnhĩ nhĩpêx nyw pumunh kôt Tĩrtũm kot tãm amnhĩ nhĩpêx ã omunh kurê kumrêx. Kormã mẽ pahte hkôt amnhĩ nhĩpêx mex kumrêx kêt tã ra hkôt amnhĩ nhĩpêx mex o mō. Jao te tãm kot amnhĩ nhĩpêx pyrək o amnhĩ nhĩpêx o mō.

4

Jejus kapēr te kêp kanê pyrək ã harēnh

Wam Korĩt 2.1-5; Sikũn Korĩt 1.12; Wam Tesarõn

2.1

¹ Nẽ na pre Tĩrtũm ixto mex nẽ tanhmã kãm ixàpēnh to hã inhmã karō. Ixte ma mẽ kãm kapēr jarēnh o ri mẽ hkôt ixpa kaxyw. Jakamã na pa hte ixàmnhĩx mẽ hkôt mẽ kãm harēnh o ri ixpa. ² Nhũm mẽ hkwỳjaja axtem nẽ ixêx o ri ixpa hã ijarēnh tã ixte ã amnhĩ nhĩpêx anhỳr kêt. Na pa hte amnhĩ tomnuj o ri ixpa hkêt nẽ. Mẽ hkwỳjaja kot mẽ no kupyw mẽ kãm Tĩrtũm kapēr o hêx o pa htã pa na pa hte ã amnhĩ nhĩpêx anhỳr kêt nẽ. Ixprĩ hã mẽ kãm harēnh o ixpaja na inhmã hprãm jakamã na pa hte ixkatat kôt harēnh o ri mẽ hkôt ixpa. Mẽ piitã mẽ kot ixêx kêt kêt ixpumunh mex

kaxyw. Tĩrtũm kot ixêx kêt kôt ixpumunh mex.
³ No nhỹrmã mẽ htyk nẽ ma kuwy hwỳr mẽ pa
 mã xwỳnh pixjaja na htem hprĩ hã ixkapêr mar
 mex kêt nẽ. ⁴⁻⁶ Satanasti tãm kêp mẽ hpãm. Kêp
 mẽ kãm Tĩrtũm kapêr mar prãm kêt xwỳnh piitã
 mẽ hpãm. Jakamã na pa hte mẽ kãm tanhmã Jejus
 jarênh to. Kêp Tĩrtũm Kra hã harẽ nẽ te kot Tĩrtũm
 kot amnhĩ nhĩpêx pyræk ã harênh o ri ixpa. Hãmri
 nhũm Satanasti tee ri ja hã ixpumu nhũm ja kêp
 omnuj nẽ. Jakamã nhũm tanhmã Tĩrtũm nê mẽ
 hkrã hto nẽ te mẽ hamak pro pyræk o mẽ hipêx.
 Mẽ kot hprĩ hã Jejus jarênh mar nẽ hkôt amnhĩ
 xunhwỳr pymaj nhũm ã nê mẽ hipêx anẽ. Jejus
 jarênh te kêp kanê hpôk mex pyræk jakamã mẽ
 kot mar kêt xwỳnhjaja te kamàt kô kamã ri mẽ pa
 pyræk. No nhũm Satanasti tãm kot nê mẽ no kupyr
 jakamã nhũm htem ã ri kamàt kô kamã mẽ pa
 pyræk o amnhĩ nhĩpêx anẽ.

Amnepê mã kormã mẽmoj kêt ri nhũm kamàt kô
 pix. Tã nhũm Tĩrtũm tanhmã kapêr to nẽ kapêr o:

—E kê hirã kato. Anẽ.

Hãmri nhũm ra kapêr xà hkôt hirã kator kurê
 kumrêx. Tã ja pyræk nẽ na pa pre kamàt kô kamã
 ixtỳx ri ixpa pyræk nhũm Tĩrtũm te kot inhmã
 kanê hpôk nhũm hirã pyræk o inhĩpêx pa mex o
 mex ã omunh kurê kumrêx. Hãmri nẽ Jejus Kris
 kot amnhĩ nhĩpêx ã omu nẽ te Tĩrtũm kot amnhĩ
 nhĩpêx ã omunh pyræk. Wa kot amnhĩ nhĩpêx te kot
 axpên pyræk.

Nẽ na pa hte pam tanhmã amnhĩ jarênh to ho ri
 ixpa hkêt nẽ. ãm Jejus Krisja pix na pa hte harẽ.
 Tapxipix na kêp mẽ panhõ Pahihti. Jakamã hkĩnhã

te ixpê mẽ amã ixàpênh xwỳnh pyràk o na pa hte mẽ amã kapêr jarênh o ri mẽ akôt ixpa.

*Pawre te kêp poti gràre nhĩpêx pyràk ã harênh
Wam Korĩt 2.4-5; Sikũn Korĩt 11.23, 12.9*

⁷ Nê Tĩrtũm ixrom hihtỳx o hihtỳx. No pa na hkĩnhã ixihỳx kêt. Te ixpê poti gràre nhĩpêx pyràk jakamã na pa hte Tĩrtũm xihtỳx xwỳnh pix nhỹ hã mẽ kãm kapêr jarênh o ri mẽ hkôt ixpa. Nhũm htem inhma nê ãm hãmri ixte ỹ hã ixkapêr ã ixpumunh kurê kumrêx. No pa ixte amnhĩ krã hkôt ixkapêr ã ijarênh kêt nê.

⁸ Na pa hte mẽ hkôt mẽ kãm Jejus jarênh o ri ixpa nhũm mẽ hkwỳja tũhã inhma nê ja hã inhĩpêx kati nê pa amnhĩ xà htỳx kamã ama. Nom nhũm Tĩrtũm mẽ kutã tanhmã ixkrã hto pa inhmã amnhĩ xà kamã ijamak pyma hkêt nê arĩ mẽ kãm kapêr jarênh o ri mẽ hkôt ixpa. Nê amnhĩ kaxyw Jejus kôt pix mã ijamaxpêr tỳx rãhã pê tee ri amnhĩ kukamã ijamaxpêr o ri ixpa hkêt nê.

⁹ Nê mẽ kãm ixkurê xwỳnhjaja ohtôô. Na htem xatã Jejus ã tanhmã ixtomnuj to htã pa kormã ixyk kêt nê. Na pa hte Tĩrtũm kamnàr rom arĩ mẽ hkôt ixpa nhũm Tĩrtũm ixkôt pa ho pa. ¹⁰ Na htem Jejus pyrã nê ixpĩr kaxyw tanhmã inhĩpêx to. No ãm ko. Kojã mẽ nhỹrmã ixpĩ rỳ ko. Ixte amnhĩ kukamã ixàhpumunh kêt. Kot paj ãm arĩ ixtĩr ri mẽ kãm Jejus jarênh o ri mẽ hkôt ixpa. Kêr kê mẽ hkwỳjaja ixkapêr ma nê axpẽn mã tanhmã Jejus jarênh to nê harênh o:

—Nà pêr ãm hãmri na pre Jejus akupỹm htĩr nê tanhmã hkwỳjê ho mex to. ãm hãmri na hte Pawre ja hã harê. Anê.

¹¹ Mě kot Jejus ã ixpĩr mã tã pa arĩ mẽ kãm akupỹm hĩr ã harẽ. Tĩrtũm na hte ja kaxyw tanhmã ixkrã hto pa arĩ mẽ kãm harẽnh o ri mẽ hkõt ixpa. ¹² Na pa pre ra mẽ amã harẽ ka prem inhma nẽ Jejus kõt amnhĩ xunhwỳr kurẽ kumrẽx nẽ amnhĩ nhĩpêx nyw o amnhĩ nhĩpêx o ri apa. Jakamã ixpyrà nẽ mẽ apê atĩr tũm nẽ apa mã xwỳnh. Nhũm htem piitã mẽ ate Jejus kõt amnhĩ xunhwỳr ã mẽ apumu. Tã nhũm mẽ kot Jejus ã ixpĩr kaxyw. Nom kwār mẽ mãmri xpi. Ja inhmã tanhmã kute hkêt. Mě kot ixpĩr mã tã kot paj arĩ Jejus kapěr jarẽnh o ri ixpa rãhã ty. Ra mẽ kot ixkapěr mar nẽ Jejus kõt amnhĩ xunhwỳr xwỳnhjaja mẽ pahpyrà nẽ kęp hĩr tũm nẽ pa ho pa mã xwỳnh kẽnã. ¹³ Jakamã kwār mẽ mãmri xpi. Na pa hte arĩ amnhĩ kaxyw Tĩrtũm kõt ijamaxpěr mex rãhã nẽ. Amnepê mã na pre Pahi finat Tawija tanhmã Tĩrtũm kapěr jarẽnh to nẽ harẽnh o:

ãm hãmri na Tĩrtũm kapěrja. Hêx kêt jakamã na pa hte mẽ kãm harẽnh rãhã ho ri ixpa. Anẽ. Tã pa hte Tawi pyrà nẽ mẽ piitã mẽ kãm Tĩrtũm kapěr jarẽnh o ri ixpa. Tĩrtũm kot mẽ pamã tanhmã mẽmoj to hêx to hkêt. ¹⁴ Ra kot amnhĩ jarẽnh xà hkõt akupỹm Pahihti Jejus o hĩr jakamã kot puj mẽ nhỹrmã uràk nẽ ty nhũm akupỹm mẽ pahto mẽ pahĩr nẽ ma war amnhĩ wỳr mẽ pahto api.

¹⁵ Amnepêm na pa pre ma mẽ awỳr mō nẽ mẽ akõt mẽ amã Tĩrtũm kapěr jarẽnh o ri ixpa. Ka prem inhma nẽ Jejus kõt amnhĩ xunhwỳ nẽ ixpyrà nẽ Tĩrtũm mã mex o mex ã harẽ. Jakamã kwār mẽ mãmri Jejus ã tanhmã inhĩpêx to. Kojã mẽ gaa

ně rĩ mẽ hkwyjaja mẽ pahpyrà ně Jejus kôt amnhĩ xunhwỳ ně Tĩrtũm mã mex o mex ã harě.

Pawre tee ri amnhĩ kukamã hamaxpěr kêt ã kot amnhĩ jarěnh

Rõmãn 8.17; Sikûn Korîť 1.7; Wam Pêtre 1.3-9, 4.12-16, 5.10

¹⁶ Jakamã na pa tee ri amnhĩ kukamã ijamaxpěr o ixkaprĩ ně ixpa hkêt ně. Mě kot Jejus ã tanhmã ixtomnuj to htãã pa hte ixãmnhĩx kapěr jarěnh o ri ixpa. Ra ixpigêt ně ixirerek o inhmõr tã inhõpinh xà kaxwỳnh kãm ijamaxpěr o Jejus kôt amnhĩ nhĩpêx mex o mõ. ¹⁷ Mě kãm ixkurê xwỳnhjaja na htem Jejus ã inhĩpêx kati htã ã inhĩpêx anhỹr japjê hkêt ně. Nom kot paj nhỹrmã ty nhũm Jejus akupỹm ixto ixtĩr pa Tĩrtũm mẽ wa kuri inhmex kumrêx ně ixpa ho ixpa. Mě kot ixtomnujja na mẽ ho apkati grêre no kot paj nhỹrmã Tĩrtũm mẽ Krata wa kuri inhmex kumrêx ně ixtĩr tũm ně ri ixpa ho ixpa. Jao rãhã ho rãhã.

¹⁸ Jakamã na pa tee ri mẽ kot tanhmã ixtomnuj tota kukamã ijamaxpěr o ri ixpa hkêt ně. Ja koja tokyx hapêx. Na pa hte ãm nhỹrmã Tĩrtũm nhõ krĩ kamã inhmex ně ixkĩnh rãhã ri ixpaja pix kukamã ijamaxpěr o ri ixpa.

5

Mě panhĩ nyw jarěnh

Piripos 3.21; Sikûn Pêtre 1.13-14

¹ Ně mẽ panhĩja te kot tyrti hô ho ixkre pyrãk. Na htem tyrti hô ho ixkre nhĩpêx nhũm gaa ně hapêx. Tã mẽ panhĩja na hte uràk ně hapêx tokyx aně. Na pu htem ri papa ně gaa ně pawej ně ty. Tã nhũm

Tĩrtũm hpãnhã mẽ pahpê hkrajê mã mẽ panhĩ nyw gõ pu mẽ kuri õ krĩ kamã pamek kumrêx nẽ pahtĩr tũm nẽ papa ho papa. ²⁻³ Na pu htem jar pahpunuj nẽ papa. Nẽ mẽ paxà nhi nẽ mẽ pahkaprĩ nẽ. Mẽ panhĩ htũmja te kot mẽ paxê htũm pyrãk jakamã na pu htem ty nẽ te paxê htũm kwryñh nẽ hpãnhã nyw jagjênh pyrãk o amnhĩ nhĩpêx. Tã na pu htem amnhĩ kukamã panhĩ nywja mã pajamaxpêr o ri papa. Kot pu mẽ kaxkwa kamã pahkarõ pix nẽ ri papa hkêt nẽ. Mẽ panhĩ nyw ã kot puj mẽ ri papa ho papa.

⁴ Nẽ na pu htem jar pahpunuj nẽ pamek kêt nẽ ri papa. Nẽ tokyx mẽ pahtyk nẽ panhĩ htũm o pajapêx nẽ hpãnhã panhĩ nyw ã mẽ papa hprãm. Tã koja Jejus tokyx akupỹn wrýk japêr pu mẽ pahtyk kêt rãhã tokyx panhĩ nywta o panhĩ nyw. Nom koja tokyx akupỹn wrýk kêt japêr pu mẽ nhỹrmã ty nhũm Tĩrtũm akupỹm mẽ pahto mẽ pahtĩr nẽ mẽ pamã mẽ panhĩ nyw gõ pu mẽ ho panhĩ nyw. ⁵⁻⁶ Na pre ra Tĩrtũm mẽ panhĩ nyw kukamã hamaxpêr nẽ mẽ pahtã tanhmã amnhĩ jarênh to. Nẽ mẽ pahwýr Karõ rẽ nhũm mẽ pahkarõ mã agjê pu mẽ ja hã amnhĩ pumu nẽ pahkĩnh nẽ pajamaxpêr o:

—Nà ra Tĩrtũm kot ixwýr amnhĩ Karõ mēnh nhũm ixkarõ mã àr jakamã koja mããnēn nhỹrmã inhmã inhĩ nyw gõ. Kormã inhĩ htũm kamã ixpa nẽ Pahihti Jejus mẽ wa õ krĩ kamã ixpa hkêt tã koja nhỹrmã inhmã inhĩ nywja gõ pa inhĩ nyw o wa kuri ixpa ho ixpa. Nà koja ã inhĩpêx anẽ.

Anhýr o pajamaxpêr pê pahkĩnh nẽ papa.

⁷ Nẽ mẽ pahte jar pano ho nhýri Jejus pumunh kêt tã no ãm panhõpinh xà kaxwýnh kãm kãm pajamaxpêr mex nẽ. ⁸ Jakamã na pu mẽ tee ri

amnhī kukamā pajamāxpēr o papa hkêt nē. Na pu htem ām tokyx mẽ pahtyk nē ma Pahihti Jejus nhō krī hwÿr paxàpir jamār o papa. Ō krīja kēp mẽ papapxà kumrēx jakamā na pu htem ma hwÿr paxàpir pix kukamā pajamāxpēr rāhā nē. ⁹ No ām mẽ pamā ja pix prām kêt. Na pu htem määnēn pamā Jejus mā hprām xà hkôt nhÿri tanhmā kām amnhī nhīpēx to ho ri papa hprām o papa. Jar mẽ panhī htūm rāhā rÿ mūtār kuri ō krī mex kām mẽ panhī nyw ā tanhmā kām amnhī nhīpēx to ho ri papaja na mẽ pamā hprām.

¹⁰ Nē na hte Krisja jar mẽ pahte tanhmā amnhī nhīpēx to hā mẽ pahpumunh o hkrī. Mẽ pahte tām amnhī nhīpēxja nē mẽ pahte amnhī tomnujja nhūm hte hā mẽ pahpumunh rāhā ho hkrī. Tā koja nhÿrmā kot mẽ pahte tanhmā amnhī nhīpēx to hā mẽ pahpumunh kôt tanhmā mẽ panhīpēx to. Mẽ pahte tām amnhī nhīpēx o ri papa xwÿnhjaja koja ra mẽ panē htyk kukwak ri mẽ pahto mex nē. No mẽ kot amnhī tomnuj o mẽ pa xwÿnhjaja koja mẽ homnuj tÿx nē. Jakamā na pa inhmā kām hprām xà hkôt pix mā amnhī nhīpēx o ixpa hprām nē.

Mẽ pajamāxpēr nyw jarēnh

Römān 6.4-6; Sikūn Korīt 4.2; Epes 4.22-24; Korosē 3.9-10

¹¹ Nē Tirtūm kot hprī hā mẽ pahpumunh rāhā ho hkrī jakamā inhmā kām hprām xà hkôt pix mā amnhī nhīpēx o ri ixpa hprām. Mān ka mẽ ra ja hā ixpumunh mex nē rÿ ko. Mẽ piitā mẽ kot hkôt amnhī xunhwÿr prām xàj na pa hte mẽ kām kapēr jarēnh o ri ixpa. ¹² Nom ixte ja hā amnhī to jarkrar o ri ixpa hkêt. Ām mẽ ate inhmar nē

mê kêp Kris nhỹ hã mê ahkre hã amnhĩ to hêx xwýnhjê mã tanhmã ijarênh to kaxyw na pa ã mê amã amnhĩ jarênh anê. Mê kot Tĩrtũm kapêr jahkre mex kumrêx ã amnhĩ to jarkrar tâ na htem hkôt amnhĩ nhĩpêx kêt nê. Tã mê ate aprĩ hã ixte Tĩrtũm kapêr kôt amnhĩ nhĩpêx mex ã ixpumunh nê tanhmã mê kãm ijarênh to kaxyw na pa ã te ixte amnhĩ to jarkrar pyræk o mê amã amnhĩ jarênh anê. ¹³⁻¹⁴ Mê kot ixkrã pipãnh ã ijarênh tâ Tĩrtũm na mê akaxyw ixãm pa hte mê amã kapêr jarênh o ri mê akôt ixpa. Ixkrã pipãnh kêt. Ixte Tĩrtũm kãm hprãm xà hkôt tanhmã amnhĩ nhĩpêx to xwýnh na pa. Tã mẽmo kaxyw na pa hte ã kapêr jarênh rũnh anhỹr o ri mẽ akôt ixpa? Nà inhmã mẽ akĩnh kênã. Mê ate Tĩrtũm kôt tãm amnhĩ nhĩpêx prãm xaj na pa hte ã mẽ amã kapêr jarênh anhỹr rãhã nê. Kris na pre tanhmã ixto pa inhmã mẽ akĩnh nê. Te tãm kãm mẽ ajapê pyræk. Na pre Kris amnhĩ grõnh kôt mẽ pahpiitã mẽ nê ty. Tĩrtũm kot mẽ pahte amnhĩ tomnuj mýrapê tanhmã mẽ pahto pymaj nhũm mẽ pahpiitã mẽ panê ty. Jakamã te mẽ pahpiitã Jejus kôt mẽ pahtyk pyræk o na pu htem amnhĩ nhĩpêx. Jao te mẽ pahte amnhĩ nhĩpêx tũmja mẽ pahpê hapêx par pyræk o pu mẽ amnhĩ nhĩpêx nyw o amnhĩ nhĩpêx o ri papa. ¹⁵ Mê pajamxpêr nyw o tãm mẽ pahte amnhĩ nhĩpêx o papa kaxyw na pre Jejus mẽ panê ty. Jakamã na pu htem axte amnhĩ pix kukamã ri pamã mẽmoj prãm o ri papa hkêt nê. Na pu htem mããnên Tĩrtũm kãm hprãm xà hkôt tanhmã kãm amnhĩ nhĩpêx to ho ri papa. Ja kaxyw na pre Tĩrtũm akupỹm Kris o htĩr pu mẽ kukwak ri pajamxpêr nyw o amnhĩ nhĩpêx o papa. ¹⁶ Jao mẽ piitã mẽ hkrã hkà hã mẽ omunh xà hkôt pix

mã tanhmã mẽ harēnh to hkêt nē. Mẽ kot amnhĩ tomnuj ã mẽ harēnh rỳ mẽ kot amnhĩ to mex ã mẽ harēnh kêt nē. Amnepê mã na pa pre ã Kris jarēnh anē nē harēnh o:

—Nà Krisja na hte mẽ pahte amnhĩ nhĩpêx kôt amnhĩ nhĩpêx kêt nē. Æm ri kot mẽ pahte amnhĩ nhĩpêx kwým ri amnhĩ nhĩpêx jakamã kot amnhĩ tomnuj tỳx xwýnh na.

Anhỹr ã harēnh o ixpa. Tã axte ã harēnh anhỹr hkêt nē. Kot amnhĩ tomnuj xwýnh kêt jakamã na pa hte hpãnhã hkôt pix mã tanhmã kãm amnhĩ nhĩpêx to ho ri ixpa.

*Mẽ pahpê Tĩrtũm kràmnhwỳ hã mẽ pajarēnh
Rômãn 5.1, 5.10; Epes 6.20; Korosẽ 1.20*

¹⁷ Nē koja mēhõ Kris kôt amnhĩ xãm nhũm kot amnhĩ nhĩpêx tũmja kęp hapêx nhũm hpãnhã kot amnhĩ nhĩpêx nyw pix o amnhĩ nhĩpêx nē hamaxpēr nyw pix o hamaxpēr. ¹⁸ Tĩrtũm na hte tanhmã mẽ pahto pu mẽ ã amnhĩ nhĩpêx anhỹr o ri papa. Na pu prem pamã hkurê htã nhũm Kris kukwak ri mẽ pahte hkôt amnhĩ nhĩpêx xwýnhjê ho hkràmnhwỳ. Hãmri nē tanhmã mẽ pahte amnhĩ nhĩpêx to hã mẽ pamã karõ nē mẽ pamã:

—E kēr ka mẽ ma krĩ piitã hkôt ri mẽ kãm ixkapēr jarēnh o ri apa kê mẽ ama nē mẽ apyrà nē Kris kôt amnhĩ xunhwỳ. Pa ja hã mẽ omu nē ixte mẽ anhĩpêx pyrà nē mẽ ho ixkràmnhwỳ. Anē.

¹⁹ Jakamã na pa hte ma mẽ kãm kapēr jarēnh o ri mẽ hkôt ixpa nē mẽ kãm:

—E pa mẽ amã mẽmoj mex jarē ka mẽ inhma. Nà na pre Krisja mẽ pahte amnhĩ tomnuj mỳrapê mẽ panê ty. Nē htyk o Tĩrtũm mã mẽ pahpãnhã

amnhîrer par kumrêx. Jakamã na ra Tîrtûmja Kris kukwak ri kãm mẽ pahpiitã mẽ pahto hkràmnhwỳ prãm. Koja kukwak ri mẽ pahte amnhî tomnuj piitã ho hamakêtkati nê axte kãm hamaxpêr kêt kumrêx. Kãm mẽ pahto hkràmnhwỳ hprãm jakamã koja ã mẽ panhîpêx anê. Jakamã e kwa mẽ tokyx Kris kôt amnhî xunhwỳ kê Tîrtûm kot inhîpêx pyrà nê mẽ ato hkra nê mẽ ato hkràmnhwỳ.

Anhÿr o mẽ kãm harênh o ri mẽ hkôt ixpa. ²⁰ Kris kot mẽ apiitã mẽ awỳr inhmênh jakamã na pa hte ÿ hã mẽ amã kapêr jarênh o ri mẽ akôt ixpa nê mẽ amã:

—E Tîrtûm kãm mẽ ajapê jakamã na mẽ awỳr inhmê pa mō. Jakamã kwa mẽ tokyx amnhî tomnuj kaga nê hkôt amnhî xunhwỳ. Kê amnhî tã mẽ apumu nê mẽ ato hkràmnhwỳ. Anê.

²¹ Krisja aa kot tanhmã amnhî tomnuj to hkêt kumrêx tã nhũm pre Tîrtûmja te mẽ kot amnhî tomnuj tỳx kumrêx xwỳnh pyràk o hipêx. Tã mẽmo kaxyw na pre ã hipêx anê? Nà mẽ panê kênã. Mẽ pahte hkôt amnhî xunhwỳr nhũm kot mẽ panhîpêx o te aa mẽ pahte amnhî tomnuj kêt kumrêx xwỳnh pyràk o mẽ panhîpêx kaxyw na pre ã mẽ panê Krata nhîpêx anê.

6

¹ Tã kot ã Kra nhîpêx anhÿr jakamã kwa mẽ ixkapêr ma nê mar tỳx nê. No mẽ ama nê ãm mar kêt nê. Tîrtûm kãm mẽ pajapê htỳx jakamã mẽ pakutã nojarêt rãhã ho pa. Kumã na pa hte ã mẽ amã kapêr jarênh anhÿr o ri mẽ akôt ixpa.

² Amnepê mã na pre Ijaew mã kapêr nê mẽ kãm:

Na ka prem amex kêt nẽ ri apa nẽ amnhĩ to ixwỳ
pa pre mẽ ama nẽ mẽmojta pê mẽ apytà nẽ
mẽ ato mex nẽ. Anẽ.

Jakamã kwa mẽ inhma. Tĩrtũm kãm mẽ ate amnhĩ
tomnuj pê mẽ apytàr prãm tỳx jakamã kwa mẽ
tokyx amnhĩ to awỳ kê ã kêp mẽ apytàr anẽ.

*Mẽ kot Kris ã tanhmã Pawre nhĩpêx to hã mẽ
harẽnh*

Sikũn Korĩt 4.7, 11.23-33; Korosẽ 1.10

³⁻⁴ Nẽ mẽ kot Tĩrtũm kapêr mar nẽ hã ixtomnuj
tã pa hte amnhĩ katut kôt mẽ kot tanhmã ixtomnuj
toja rẽ nẽ ho ijamakêtkati tokyx anẽ. Nẽ arĩ mẽ
kãm kapêr jarẽnh rãhã ho ri mẽ hkôt ixpa. Mẽ kot
mar nẽ ãm mar nẽ hkaga pymaj na pa hte ã amnhĩ
nhĩpêx anhỹr rãhã nẽ. Mẽ kot ja hã inhĩpêx punuj
tã pa arĩ mẽ kãm harẽnh o ri mẽ hkôt ixpa. ⁵ Mẽ kot
Kris ã ixtak nẽ ijagjênh nẽ tanhmã ixto kaxyw ixtã
htu htã pa hte mẽ kutã amnhĩ to htỳx nẽ ixkuhê.
Na pa pre hte Tĩrtũm mã mẽ kãm kapêr jarẽnh rax
nẽ. Jao tõhã inhõt kêt nẽ inhõtɣwa ho ri mẽ hkôt
ixpa. Nẽ tõhã inhmã prãm tỳx nẽ ri ixpa. Tã no ãm
arĩ mẽ kãm kapêr jarẽnh rãhã nẽ. ⁶ Inhmã tanhmã
ixte amnhĩ tomnuj to hprãm kêt. Inhmã Tĩrtũm kot
amnhĩ nhĩpêx kôt pix mã amnhĩ nhĩpêx prãm. Nẽ
inhmã inhgryk tokyx anhỹr prãm kêt. ãm inhmã
mẽ piitã mẽ hkĩnh kãm mẽ ho mex pix prãm. ã na
pa hte Tĩrtũm Karõ nhỹ hã amnhĩ nhĩpêx anhỹr o ri
mẽ hkôt ixpa. Mẽ kot ja hã ixpumunh nẽ ra Tĩrtũm
kapêr ma nẽ hkôt amnhĩ xunhwỳr kaxyw. ⁷ Na pa
hte ixkatat kôt mẽ kãm ixkapêr mex pix nẽ. Tĩrtũm
xihtỳx xwỳnhja nhỹ hã ri mẽ kãm kapêr jarẽnh jao
tãm amnhĩ nhĩpêx nẽ tãm ri ijamaxpêr o ri mẽ hkôt

ixpa. Jakamã na htem ja hã ixpumu nẽ ixte Tĩrtũm kapẽr jarẽnh ma nẽ hkõt amnhĩ xunhwỳ. ⁸ Na hte mẽ hkwỳjaja kãm ixkĩnh nẽ nhũm mẽ hkwỳjaja axtem kãm ixkurê nẽ. Nẽ mẽ hkwỳjaja amnhĩm inhmex ã ijarẽ nhũm mẽ hkwỳjaja axtem axpẽn mã tanhmã ixto kapẽr punuj to. Mẽ kot ixêx nhi hã ijarẽnh tã pa hte ixkatàt kõt mẽ kãm ixkapẽr o ri ixpa. Nom kwãr mẽ mãmri tanhmã ri ixto kapẽr to. Ja tanhmã inhmã kute hkêt. ⁹ Na hte mẽ hkwỳjaja ixkamã òkre kahak nẽ pika piitã hkõt axpẽn mã tanhmã ijarẽnh to ho pa. Mẽ kãm ixpĩr prãm tã no pa arĩ ixtĩr nẽ ixpa. Mẽ kot Jejus ã ixtomnuj tỳx tã kormã ixpĩr kêt nẽ pa ri ixtĩr nẽ ixpa. ¹⁰ Ixte Kris ã amnhĩ xã htỳx kamã ijamak o ri ixpa htã arĩ ixkĩnh nẽ ixpa. Nẽ ixkàxpore hkêt tã nhũm mẽ ohtô nẽ ixte mẽ kãm Jejus kapẽr jarẽnh kukwak ri mex nẽ pa. Nẽ ixkukrêx rax kêt tã nhũm Tĩrtũm ixto mex nẽ pa inhmex nẽ ixpa. Tã kot paj nhỹrmã ò krĩ kamã kuri inhmex kumrêx nẽ ixtĩr tũm nẽ ixpa ho ixpa. Jakamã na pa hte arĩ mẽ kãm Jejus kapẽr jarẽnh o ri mẽ hkõt ixpa. ¹¹ E Korît kãm ixkràmnhwỳjaja. Na pa ixprĩ hã mẽ amã amnhĩ nhĩpêx jarẽnh par kumrêx. ¹² Inhmã mẽ akĩnh tỳx tã te mẽ amã ixkĩnh kêt pyràk. ¹³ Kwa te mẽ ate ixto mẽ akatut nẽ akuhê pyràk o inhĩpêx kêt nẽ. Amnhĩ pyrà nẽ amã ixkĩnh nẽ hkêt wehe. Te mẽ apê ixkra pyràk o na pa ã mẽ amã ixkapẽr anẽ.

Te mẽ pahpê Tĩrtũm nhõrkwỹ pyràk ã mẽ pajarẽnh Wam Korît 10.20-22, 15.33; Epes 5.3-14; Sikün Ximotre 2.4; Xiakre 4.4-5; Wam Pêtre 2.11, 4.1-6

¹⁴ Nẽ kêr ka mẽ kot Kris kõt amnhĩ xunhwỳr kêt xwỳnhjê mẽ mẽ mẽmoj tã tanhmã axpẽn mar to

hkêt nê. Rỳ mēhō ho amjên rỳ mēhō ho aprō hkêt nê. Ahp̃nhã mē pajamxp̃r kênã. Tanhmã kot we mē hamaxp̃r nyw xw̃nhjaja nê mē hamaxp̃r tũm xw̃nhjaja amnhĩ to nê axp̃n kôt hamaxp̃r nê ri axp̃n kôt pa? Nà koja mē ã amnhĩ nhĩp̃x anh̃r kêt nê. Ahp̃nhã mē pajamxp̃r. Na hte hirã ht̃yxja kamàt kô mē pihkàr kêt nê. ¹⁵ Xà na hte Kris mē Satanasti wa axp̃n kôt hamaxp̃r? Nà wa kot axp̃n kôt hamaxp̃r kêt. Ahp̃nhã wa hamaxp̃r nê ahp̃nhã wa kot amnhĩ nhĩp̃x. Nê ahp̃nhã hirã nê ahp̃nhã kamàt kô. Nê mē pahpê Kris kw̃yjaja nê mē kēp hk̃w̃y hkêt xw̃nhjaja ahp̃nhã mē pajamxp̃r nê ahp̃nhã mē pahte amnhĩ nhĩp̃x. ¹⁶ Na pu htem Tirtũm mã amnhĩ jarēnh xà hã ixkre kamã sãnti xunhw̃r nê amnhĩ to hw̃r pē kãm mex o mex ã harēnh kêt nê. Axtem na sãntija. Mē panhō Tirtũmja sãnti rom h̃ir tũm rãhã nê pa ho pa xw̃nh. Nê mē papajaja te mē pahpê Tirtũm nhõrkw̃y pyràk. Kap̃r ã kagà htũm kot ja jarēnh kot:

Ixkrajaja te kēp inhõrkw̃y nhũm ixpê õ dõn pyràk.
 Te ixpê inhõrkw̃y kamã ixpa xw̃nh pyràk
 jakamã kot paj ixkrajê kamã ri ixpa ho ixpa.
 Ixpê Mēhpãm na pa. Anê.

¹⁷⁻¹⁸ ã Tirtũm xiht̃yx xw̃nhja kot amnhĩ jarēnh anh̃r jakamã na hte mē kot amnhĩ tomnuj xw̃nhjê nê mē pahkurê ho:

Kér ka mē hkôt ri apa hkêt nê. Kwarĩ ho kwarĩ.

Nê mē hkôt ri amnhĩ nhĩp̃x o apa hkêt nê.

Kot kaj mē ixkap̃r ma nê ixkôt amnhĩ nhĩp̃x hã
 kot paj amnhĩ w̃r mē aw̃y nê mē ato ixkra.

Nê pa kot paj ixpê Mēapãm maati. Anê.

7

¹ Tã ã Tĩrtũm kot mẽ pahto hkra nẽ mẽ pahkõt pa ho pa hã amnhĩ jarẽnh kot anhỹr jakamã kwa ixkrãmnhwỳjaja. Kêr pu mẽ kapêr ma nẽ tanhmã amnhĩ tomnuj to hkêt nẽ. Nẽ mẽmoj punuj kukamã pajamaxpêr kêt nẽ. Nẽ ãm kapêr kôt pix mã amnhĩ nhĩpêx mex rãhã nẽ.

Pawre kot Korît nhõ xwỳnhjê nhỹ hã hkĩnh ã harẽnh

² Nẽ kwa Kris kôt ixtõ nẽ ixtõxjaja. Kêr ka mẽ tee ri amnhĩ tã tanhmã inhmã ajamaxpêr to hkêt nẽ. Na pa pre tanhmã mẽ atõ hto hkêt nẽ. Rỳ tanhmã mẽ atõ hto ka mẽ ja hã ixpumu nẽ ixkõt tanhmã amnhĩ tomnuj to hkêt nẽ. Rỳ pa pre ixêx rom tanhmã mẽ anokupyr to ho ri ixpa hkêt nẽ. Kwa mẽ amã ixkĩnh nẽ tokyx ixkõt ajamaxpêr kêt wehe.

³ Mẽ ate inhmar nẽ amnhĩ tã apijaam kaxyw na pa ã mẽ amã ixkapêr anhỹr kêt nẽ. Inhmã mẽ akĩnh kênã. Na pa pre inhmã mẽ akĩnh ã amnhĩ jarẽnh rax nẽ. Inhmã ri mẽ akôt ixpa rãhã ho ixpa hprãm. Rỳ ka mẽ nhỹrmã apiitã apikaprãr par japêr pa inhmã mẽ akôt ixtyk prãm nẽ. ⁴ Na pa hte ra mẽ amã ijamaxpêr pẽ ixkĩnh nẽ ixpa. Nà kot kaj mẽ ixkapêr ma nẽ Jejus kôt amnhĩ nhĩpêx mex nẽ. Tã kêr ka mẽ ã amnhĩ nhĩpêx anhỹr rãhã nẽ. Na pa hte jar ra amnhĩ xà htỳx kamã ijamak o ri ixpa htã no ãm mẽ amã ijamaxpêr nẽ ixkĩnh nẽ.

⁵ Nẽ na pa pre amnẽ Masetõn wỳr kormã Xitre japêr o mō. Hãmri nẽ Masetõnja wỳr pōj nẽ hapêr pẽ mẽ kãm Jejus kapêr jarẽnh o ri mẽ hkõt ixpa. Hãmri nhũm mẽ kãm ixkurê xwỳnhjaja Kris ã inhĩpêx punuj nẽ hã inhmã àkjêr pix o pa. Hãmri

nē ma Masetōn kamā krī piitā hkôt ri mē kām ixto kapēr punuj nē pa amnhĩ tã mē mar o ri mē hkôt ixpa. Nē mē kajaja mē ate Kris kaga nē nhām mē hamaxpēr kôt amnhĩ nhĩpêx pymaj na pa pre tee ri mē akukamã ijamaxpēr o ri mē hkôt ixkaprĩ nē ixpa. ⁶ Tã Tĩrtũm kēp mē hkaprĩ xwỳnhjê pumunh nē akupỹm mē ho mē hkĩnh xwỳnh jakamã na pre ixkaprĩ hã ixpumu nē ixwỳr Xitre mē. Pa pre omu nē akupỹm ixkĩnh nē tãm ijamaxpēr. ⁷ No ãm Xitre pumunh kôt pix mã ixkĩnh kêt. Na pre ixwỳr pôj nē tanhmã inhmã mē ajarēnh to nē mē ate tanhmã ho mex to hã mē ajarē. Nē mē amã ixpumunh prãm tỳx ã mē ajarē. Nē Kris kôt mē atōta hpijaàm kêt o pa nhũm ixte kagà kamã hã mē amã ixàkjêr nhũm mē ate ja hã omunh nē ra amnhĩ kamã apijaàm o akaprĩ htỳx ã mē ajarē. Nhũm Tĩrtũm kot inhnê mē kām ixkurê xwỳnhjê pumunh mex kaxyw mē ate ixto hwỳr ã mē ajarē. Na pre ã inhmã mē ajarēnh anē pa kuma nē mē anhỹ hã ixkĩnh tỳx kumrêx.

⁸⁻⁹ Nē wam ixte mē amã kagàta nhĩpêx kêt ri na pa pre tee ri mē ate amnhĩ nhĩpêx ã mē ajarēnh ma nē mē akaxyw hipêx. Nē kamã mē ate hpijaàm kêt xwỳnhhta kot tanhmã amnhĩ nhĩpêx to hã omunh nē ãm omunh o arĩ hkôt apa hã kagàta kamã mē amã akir hãmri nē Xitre mã kugõ nhũm kupy nē ma mē awỳr o mō. Tã ka xep prem kamã harē nē ama nē amnhĩ kamã apijaàm nē. Nē akaprĩ nē ajamaxpēr o:

—Hêxta waa nē. ãm hãmri na Pawre ã mē ijarēnh anē. Na pa mē ã amnhĩ nhĩpêx anē nē amnhĩ tomnuj tỳx nē. Anē.

Tã nhũm Xitre akupỹn ixwỳr pôj nē inhmã mē

ajarë. Pa mẽ ajarënh ma nẽ tee ri ijamaxpër nẽ ijamaxpër o:

—Hêxta waa nẽ. Mon pa pre axtem nẽ ã ri mẽ kãm ixàkjêr anê? Nà na xep prem kagàta kamã harë nẽ kuma nẽ hkaprĩ htỳx nẽ. Anê.

Tã ãm hãmri na pa pre ã mẽ akaxyw hipêx nẽ mẽmojta ã mẽ amã ixàkjêr anê. Na ka xep prem kamã harë nẽ ama nẽ tee ri ajamaxpër o ra akaprĩ nẽ. Nom Tĩrtũm kãm hprãm xà hkôt na ka prem ja hã amnhĩ pumu nẽ ã akaprĩ anê. Tã xep ra akupỹm tãm amnhĩ nhĩpêx nẽ akupỹm Tĩrtũm kôt amnhĩ nhĩpêx mex nẽ. Jao akupỹm akĩnh nẽ ri apa. Jakamã ãm hãmri na pa pre mẽ awỳr wam kagàta mẽnh nẽ mẽmoj tã ã mẽ amã ixàkjêr anê.

¹⁰ Koja Tĩrtũm krajê hõ tanhmã amnhĩ tomnuj to. Hãmri nẽ tee ri ja hã amnhĩ pumu nẽ amnhĩ kamã hpijaàm nẽ akupỹm Tĩrtũm kôt tãm amnhĩ nhĩpêx. Hãmri nẽ akupỹm mex nẽ tãm hamaxpër pê hkĩnh nẽ ri pa. Nẽ axte tee ri amnhĩ kukamã hamaxpër hkêt nẽ. Ja na Tĩrtũm kãm hprãm. Tã koja mẽ kêp hkra hkêt xwỳnhjê pyrà nẽ tanhmã amnhĩ tomnuj to nẽ ra hpijaàm japêr. Nom hkwỳjaja kot ja hã omunh pix mỳrapê hpijaàm nẽ arĩ Tĩrtũm kôt amnhĩ nhĩpêx kêt japêr. Hã koja nhỹrmã ty nẽ Tĩrtũm kra kot akupỹm hkôt tãm amnhĩ nhĩpêx xwỳnhjê kĩnhã Tĩrtũm pê awry rax kumrêx nẽ ri pa.

¹¹ Mẽ pahte Tĩrtũm kapêr kwỳm ri tanhmã amnhĩ nhĩpêx to hã tee ri amnhĩ pumunh nẽ amnhĩ kamã hpijaàm nẽ akupỹm tãm amnhĩ nhĩpêxja na Tĩrtũm kãm hprãm. Tã na ka xep ã amnhĩ nhĩpêx anê. Wam ixte mẽ awỳr kagà mẽnhta na ka xep prem kamã tanhmã ixte nã

puro kamã hpijaàm kêt xwỳnhta ã mẽ amã ixàkjêr tota kamã akapêr nê ama. Hãmri nê tee ri mẽ ate kormã kot amnhĩ tomnuj ã kãm axàkjêr kêt ã amnhĩ kukamã ajamaxpêr nê amnhĩ kamã apijaàm nê. Nom Tĩrtũm kãm hprãm xà hkôt. Mẽ ate jam ajamaxpêr pê amnhĩ kamã apijaàmja na kãm hprãm. Tã ka mẽ hpijaàm xwỳnhta kamã agryk nê kãm akapêr o:

–Kwa mẽ pahpê Jejus kwỳjaja mẽ pahte ã amnhĩ nhĩpêx anhỹr kêt tã ka ã amnhĩ nhĩpêx anê. Nà na ka amnhĩ tomnuj tỳx kumrêx. Kot kaj ã amnhĩ nhĩpêx anê pa mẽ hã apumu nê gaa nê apyrà nê ã amnhĩ tomnuj anê. Kwa ja kaga nê axte ã amnhĩ nhĩpêx anhỹr kêt nê. Nê akupỹm Tĩrtũm kôt amnhĩ xãm tỳx nê hkôt amnhĩ nhĩpêx rãhã ho ri apa. Anê.

Hãmri nhũm krĩ nhõ xwỳnhjaja ja hã mẽ ajarênh ma nê mẽ apê jamnuj ã mẽ apumunh kurê kumrêx. ãm hãmri na ka prem ã kãm akapêr anê.

¹² Nê ixte mẽ awỳr kagà nê mênhta kamã na pa pre nã puro kamã hpijaàm kêt xwỳnhta mã tanhmã ixàkjêr to hkêt nê. Rỳ nã purota mã tanhmã ixàkjêr to hkêt nê. Na pa pre mẽ apê Kris kwỳjê hwỳr kagà nhĩpêx nê kamã tanhmã mẽ amã hpijaàm xwỳnhta ã karõ hto. Mẽ ate kamã harênh hãmri nê inhỹ hã amnhĩ nê hanor nhũm Korît nhõ xwỳnh piitã kot ã mẽ ate amnhĩ nhĩpêx anhỹr ã mẽ apumunh kaxyw. Nê mẽ ate Tĩrtũm nom ã hipêx anhỹr jao mẽ amã ixkĩnh pê ixkapêr kôt ã hipêx anhỹr ã amnhĩ pumunh kaxyw.

¹³ Tã nhũm Xitre ixwỳr pøj nê tanhmã inhmã mẽ ajarênh to. Na xep pre mẽ awỳr nojarêr nê tee ri amnhĩ kukamã hamaxpêr. Mẽ ate kagàta kamã

harēnh nē ijarēnh mar nē kamã agryk pymaj tee ri amnhĩ kukamã hamaxpēr. Tã ma mē awỳr mōn pōj nē mã amã kugõ. Ka xep prem kamã harē nē ama nē hkõt amnhĩ nhĩpêx kurê kumrêx nhũm mē ate amnhĩ nhĩpêx ã mē apumu nē hkĩnh nē. Hãmri nē tãm hamaxpēr. Tã ra akupỹn ixwỳr mō nē inhmã mē ajarē pa mē ajarēnh ma nē ijaxwỳja ixkĩnh nē. ¹⁴Na pre kormã mē awỳr nojarêt pa kãm tanhmã mē amex ã mē ajarēnh to. Tã nhũm xep ma mē awỳr mōn pōj nē mē apumu nē hamaxpēr o:

—Nà pēr ãm hãmri na pre Pawre inhmã mē mex ã harē. Mē mex kênã. Anē.

¹⁵Tã nhũm pre mē arũm kato nē ra man akupỹn ixwỳr mōn pōj nē inhmã mē ajarēnh o:

—Na pa pre ma mē hwỳr mō nē mē kãm ixkapēr o ri mē hkõt ixpa nhũm mē ixkapēr ma nē ixkõt amnhĩ nhĩpêx kurê kumrêx nē ixto mex nē. Kormã ixte mē hwỳr inhmōr kêt tã mē harēnh ma nē inhmã mē hkĩnh nē. Tã pa ma mē hwỳr mō nhũm mē ixto mex rax nē pa ra inhmã mē hkĩnh tỳx kumrêx. Anē.

¹⁶Ã inhmã mē ajarēnh anē pa mē ajarēnh ma nē ixkĩnh tỳx nē. ãm hãmri na ka htem mẽmoj tã amnhĩ jarēnh xà hkõt tanhmã amnhĩ nhĩpêx to ho apa.

8

Mē kot Kris kôt mē hkwỳjê pê õxỳ hkêt ã mē kãm karõ

Atre 11.27-30; Rõmãn 15.25-27; Wam Korît 16.1-4

¹E Kris kôt ixkwỳjaja. Kot paj hpãnhã mē amã jar Masetõn kamã tanhmã Jejus kwỳjaja kot amnhĩ

nhĩpêx to hã mẽ harê ka mẽ harênh ma. Na hte Tĩrtũm mẽ kutã nojarêť nhũm mẽ mex nê pa. ² Mẽ hkwỳjaja kot Kris ã mẽ hipêx kati nhũm mẽ kot amnhĩ xà htỳx kãm hamak o pa htã hkĩnh nê hamakêtkati nê ri pa. Nê mẽ hkàxpore hkryre htã ho õxỳ hkêť nê pa. Na htem àmnhĩx ri mẽ kêp amrakati xwỳnhjê mã hkwỳ nhõr o pa.

³⁻⁴ Tã na prem Jerujarê kamã Kris kôt mẽ pahkwỳjê jarênh ma. Mẽ kêp amrakati hã mẽ harênh ma nê kãm mẽ hkaprĩ nê. Nê mẽ kãm mẽ hwỳr mẽmoj rênh nê mẽ ho ajuta hprãm nê. No ãm pa ixte mẽ kãm hã karõ xà hkôt kêt. Mẽ tãmjaja mẽ hamaxpêr xà hkôt na prem ã hamaxpêr anê nê mẽ kaxyw kàxpore ho pikuprõnh rax nê. Hãmri nê inhmã kugõ nê inhmã:

—Kwa na pa prem Jerujarê kamã Kris kôt mẽ pahkwỳjê jarênh ma nê mẽ inhmã mẽ hkaprĩ nê mẽ kãm mẽ ixkàxpore hkwỳ ho akuprõ. Jakamã e amỳ nê ma mẽ hwỳr o mõ nê mẽ kãm agõ kê mẽ tokyx ho amnhĩm awjaprõ nê kuku. Anê.

⁵ Pa mẽ kuma nê ixtỳx ho ãm kàxpore grire hã hkamnhĩx nê ijamaxpêr o:

—Kwa mo mẽ hikàxpore rax koja mẽ ri ho akuprõ nê mẽ kãm kugõ? ãm mẽ hikàxpore hkryre kênã.

Anhỳr o ijamaxpêr tã no nhũm mẽ kaxyw ho rax nê ho akuprõ. Mẽ hikàxpore hkryre htã mẽ kãm õr rax nê. Hãmri nê inhmã amnhĩ jarênh o:

—Na pa mẽ ra Pahihti Jejus Kris mã amnhĩ gõ. Mẽ ixte tanhmã kãm amnhĩ nhĩpêx to ho ri ixpa kaxyw. Jakamã e tanhmã mẽ inhmã mẽmoj tã karõ hto. Kot pa mẽ ama nê akapêr kôt amnhĩ nhĩpêx. Ja na pa mẽ inhmã hprãm nhũm Tĩrtũm haxwỳja kãm ja prãm. Anê.

⁶ Na pa pre ã mẽ kot amnhĩ nhĩpêx anhÿr ã mẽ omu nẽ mẽ apê Korīt nhõ xwÿnhjê mã ijamaxpêr kurê kumrêx. Hãmri nẽ Xitre mã mẽ ajarê. Na pre mẽ awÿr mō nẽ mẽ amã Jerujarê nhõ xwÿnhjê jarê. Mẽ ate mẽ kãm kàxpore hkwȳ ho apikuprōnh kaxyw. Tã pa pre jam ijamaxpêr nẽ ra akupÿm mẽ awÿr mẽnh mã nẽ kãm:

—Kwa ma akupÿm Korīt wÿr mō nẽ mẽ kãm anẽ kê mẽ ra kot amnhĩ jarēnh xà hkôt Jerujarê nhõ xwÿnhjê kaxyw kàxpore hkwȳ ho akuprō nẽ tokyx mẽ hwÿr kumẽ. Ra mẽ kãm Kris kôt mẽ hkwȳjê hkĩnh ã amnhĩ jarēnh kênã. E kwa tokyj. Anẽ.

⁷ Na ka htem amnhĩ to mex o ri apa. Nẽ amnhĩ kaxyw Kris hkôt ajamaxpêr tÿx nẽ. Nẽ ma mẽ kãm Tĩrtũm kapêr jarēnh mex o ri mẽ hkôt apa. Nẽ mẽ ajamaxpêr mex nẽ. Nẽ mẽ piitã mẽ ho mex o ri apa. Nẽ mẽ amã ixkĩnh o ri apa. Jakamã kwa kêr ka mẽ axàmnhĩx mẽ kêp amrakati xwÿnhjê mã mẽ akàxpore hkwȳ nhõr o apa. Jao mẽ amã Tĩrtũm kĩnh tÿx ã amnhĩ to amnhĩrīt. ⁸ Ixte ã mẽ amã ja hã karõ anhÿr tã hã mẽ atã ixihtÿx kêt nẽ. ãm mẽ kamã axukapri hkôt mẽ ate mẽ kãm axàmnhõr o apa kaxyw na pa ã mẽ amã ixkapêr anẽ. Masetõn kamã mẽ pahkwÿjaja kot amnhĩ nhĩpêxta pyrã nẽ. ⁹ Ra mẽ ate Jejus Kris kãm mẽ pajapê hã kot tanhmã amnhĩ nhĩpêx to hã mar mex. Amnepem na pre kaxkwa kamã mex kumrêx nẽ ri pa ho pa nhũm mẽmoj piitã kêp õ htã nhũm rer pa nẽ mẽ pahwÿr wrÿ nẽ mẽ pakamã kêp amrakati nẽ ri pa. Hikàxpore hkêt nẽ ri pa. Tã mẽmo kaxyw na pre ã mẽmoj mex piitã rer par nẽ mẽ pahwÿr wrÿk anẽ? ãm kot mẽ pahto mex pix kaxyw. Kot mẽ pahto

mex nhũm mẽ pahte kukwak ri mẽ paxànnhĩx ri mẽ pajamakêtkati nẽ mẽ papa kaxyw na pre ã amnhĩ nhĩpêx anẽ. Mẽ pahte nhỹrmã uràk nẽ kaxkwa kamã pamex kumrêx nẽ ri papa ho papa kaxyw.

¹⁰ E kwa kêr ka mẽ tokyx kàxpore hkwỳ ho apikuprõnh pa nẽ Jerujarẽ nhõ xwỳnhjê hwỳr amẽ. Mẽ akumrêxjaja na ka prem ham amgrà hapêxta kamã ra mẽ kaxyw ho apikuprõnhja krax. Mẽ amã mẽ ho mex prãm xàj ham ho hkrax tã no ãm kormã hatur xàm mēnh nẽ mẽ hwỳr mēnh kêt nẽ. ¹¹ Kwa mẽ tokyx ja ho ajapêx nà. Na ka prem ate ho anhỹr krax ã akĩnh pê kàxpore hkwỳ ho apikuprõnh o apa. Tã kêr ka mẽ arĩ akĩnh rãhã ho apikuprõnh par jatur xàm amẽ. No mẽ ri atỳx tanhmã ajamaxpêr to hkêt nẽ. Rỳ mẽ ajamaxpêr o:

—Nà kormã. Kot paj nhỹrmã ixkàxpore rax nẽ rĩ kormã mẽ hwỳr hkwỳ mẽ.

Anhỹr o mẽ ri ajamaxpêr hkêt nẽ. Mẽ ate tanhmã akàxpore hkre kamã kute hã omunh xà hkôt mẽ kãm hkwỳ pix gõ. ¹² Kêr ka mẽ axànnhĩx akĩnh kãm mẽ kãm ho akuprõ. Ate amnhĩ kàxpore pumunh xà hkôt. Ka mẽ akàxpore rax nẽ mẽ kãm ho rax nẽ agõ. Rỳ mẽ akàxpore grire nẽ mẽ kãm ho grire nẽ agõ. Ja na kêt mex. ¹³ No mẽ ate mẽ kãm òr par nhũm mẽ arom mẽ hikàxpore rax nẽ ri paja mex kêt. ¹⁴ Nom ra mẽ akàxpore rũnh jakamã kwa mẽ amnhĩ kutã mẽ kãm hkwỳ ho hkryre nẽ ho akuprõ kê mẽ apyrà nẽ hikàxpore nẽ ri pa. Kêr ka mẽ nhỹrmã tanhmã amnhĩ to nẽ axà nẽ nhũm akàxpore apê hapêx nhũm mẽ ajarēnh ma nẽ amnhĩ kuxwar mẽ ato ajuta nẽ mẽ amã hkwỳ

ho akuprō nē mē awỳr kumē. Ka mē akàxpore ho axpēn pyrà nē ri apa. ¹⁵ Amnepēm Tirtūm kot kaxkwa rūm Ijaewjê hwỳr mēō rēnh nhūm mē kot apkati mē amnhīm hkawrà nē ho apkur o pata ā na pre Tirtūm kapēr ā kagà htūmjā ā mē harēnh anē nē mē harēnh kot:

Na pre mē hkra xohtô xwỳnhjaja mē apkur xà hkawrà rūnh nē. Nē gōj kām unhwỳ nē kuku nē piitā ho ōhy htu. Nhūm mē hkra grēre xwỳnhjaja haxwỳja hkwỳ kawrà no ām ho hkryre nē hkawrà. Nē gōj kām unhwỳ nē kuku nē haxwỳja ho ōhy htu hpa. Na pre htem apkati mē ā amnhī nhīpêx anhỳr o pa. Anē.

Ja pyrà nē kêr ka mē akàxpore ho axpēn pyrāk o ri ho apa.

Xitre mē hkràmnhwỳjê jarēnh

¹⁶ Nē Xitre na pre ixpyrà nē kām mē ato ajuta hprām nē. Na pre inhmā mē atā amnhī jarē pa pre kuma nhūm ja inhmā mex nē pa ixkīnh nē. Nē ijamaxpēr o:

—Nà ām hāmri na Tirtūm tanhmā Xitre hkrā hto nhūm ā hamaxpēr mex anē. Anē.

¹⁷ Tā pa ma akupỹm mē awỳr mōr ā hkukja nhūm inhma nē hkīnh nē mē awỳr nojarêt kurê kumrēx. Nom kormā ixte kām mē ajarēnh kêr ri nhūm tām amnhī kukamā hamaxpēr nē mē awỳr hkrā. ¹⁸ Tā na ra nojarêt kaxyw. Kot paj ma hkôt Kris kôt mē pahtojê hō mē kê ma hkôt mō. Kôt ixte mēnh xwỳnhhta na hte mē kām Tirtūm kapēr jarēnh mex nē nhūm htem amnhīm mex ā harē. ¹⁹ Na pre jar Jejus kwỳjaja kot ma ixkôt Jerujarē hwỳr kàxpore hkwỳ ho mōr kaxyw nhūm prem amnhīm mē kurê.

Tã koja Xitre mẽ wa mẽ awỳr mōn pōj ka mẽ kãm kàxporeta gō nhũm man akupỹn o mō pa wa rĩ kormã ma Jerujarẽ hwỳr mẽ kãm o mō. Mẽ kot hamỳnh nẽ mẽ pamã mẽ hkĩnh ã kot amnhĩ tã mẽ pahpumunh kaxyw. Nẽ Tĩrtũm mã mex o mex ã harẽnh kaxyw. ²⁰⁻²¹ Nom kàxpore rax nhũm ixte mẽ hwỳr o inhmōr nhũm mẽ kot hã ixkamnhĩx pymaj kot paj ma amnhĩ kôt Kris kôt mẽ pahtōta o mō. Ixte Xitre hkôt mẽ awỳr mẽnh xwỳnhhta pa ma amnhĩ kôt o mō. Nom ixàhkĩnh o ixpare hã. Tĩrtũm kot ja kôt ixpumunh mex tã kot paj ma amnhĩ kôt o mō.

²² Nẽ ot pa ma Xitreta wa hkôt axte mẽ awỳr ja mẽ. Kêr kê mẽ axkrunẽpxi nẽ ma ixkukamã mẽ awỳr mō. Ixte wa hkôt mẽnh xwỳnhhta ixte kot amnhĩ nhĩpêx ã omunh mex. Na hte kãm mẽ piitã mẽ ho ajuta ho pa hprãm nẽ. Tã mẽ ajarẽnh ma nẽ inhmã mẽ ajarẽnh o:

—Nà koja mẽ Jerujarẽ nhõ xwỳnhjê mã kàxpore nhõr rax nẽ kãm ga. Mẽ kot amnhĩ to mex kênã. Anẽ.

Jakamã ra mẽ awỳr hkrà. Tã koja ma Xitre wa hkôt mō nẽ mẽ ato ajuta ka mẽ tokyx kàxpore ho apikuprõnh pa.

²³ Nẽ koja mẽhõ tanhmã Xitre hã mẽ akukjêr to ka mẽ kêp ixkrãmnhwỳ mex ã harẽ. Nẽ kot inhĩkhô hã mẽ ho ajuta mex o pa hã harẽ. Na pre ra jar Kris kwỳjaja mẽ akaxyw kuta nẽ ma mẽ awỳr kumẽ. Jakamã koja ma mẽ awỳr mō nhũm Kris kôt mẽ pahtōjê hõ wa pijakrutja wa ma hkôt mō. Na hte wa haxwỳja Kris kôt amnhĩ nhĩpêx mex o pa. ²⁴ Koja mẽ awỳr pōj ka mẽ omu nẽ mẽ ho mex nẽ. Nẽ mẽ amã mẽ hkĩnh nẽ. Kê krĩ piitã hkôt Kris kôt

mê pahkwÿjê piitã mê hã mê ajarênh ma nê axpên mã mê amex ã mê ajarê. Nê mê ajarênh o:

—Pêr ãm hãmri na pre Pawreja mê pamã Korît kãm mê pahkwÿjê jarê. Na xep pre Xitre mê hkwyta ma mê hwÿr mō nhũm mê ho mex rax nê. Ra Pawre kot mê pamã mê harênh xà hkôt. Anê.

9

Mê kot kàxpore ho pikuprõnh ã mê harênh

¹⁻² Kwa ixkrãmnhwÿjaja. Kot paj Jerujarê nhõ xwÿnhjê kaxyw mê atã ixihtÿx kêt nê. Ra mê amã mê ho ajuta hprãm jakamã na pa pre Masetõn kamã Kris kôt mê pahkwÿjê mã mê ajarênh o:

—Pika pê Gres kamã Kris kôt mê pahkwÿjaja na prem ham amgrà hapêxta kamã Jerujarê kamã mê pahkwÿjê jarênh ma nê kãm mê ho ajuta hprãm. Anê.

Hãmri nhũm mê ajarênh ma nê mê apyrà nê kãm tanhmã mê ho ajuta hto hprãm. ³⁻⁴ Tã ot pa mê awÿr Xitre mê hõta wa mê ho ixpimràatã wa mê kumê. Mê kot kàxpore hã mê akukjêr kaxyw. Kêr pa mytwrÿ hõ hã ma Masetõn nhõ xwÿnh kwÿjê mê mê awÿr mō nê ra ixte mê kãm kàxpore hkwy ho mê apikuprõnh ã mê ajarênh kôt mê ate ho apikuprõnh rax ã mê apumu nê ixkĩnh nê. Nom kot pa mō nê tee ri hapêr nê te ixte Masetõn nhõ xwÿnhjê mã mê ato ixêx pyrã nê xpijaàm nê. Ka mê ajaxwÿja amnhĩ kamã apijaàm nê. ⁵ ã mê pahte amnhĩ nhĩpêx anhÿr pymaj na pa ã mê amã kagàja nhĩpêx nê Xitre mã òr nê ma amnhĩ kukamã mê awÿr mênh anê. Nê hkôt wa mör mã xwÿnhnta mê ho ixpimràatãã amnhĩ kukamã wa

mê kumê. Tã kê mê awÿr pøj nê mê amã kagaja gõ ka mê kamã harê nê ama nê tokyx kàxpore ho apikuprõnh jatur xàm amê. Kêr pa mê hapu hã mê awÿr mō ka mê ra mê ixkutêp ho apikuprõnh pa nê mê kãm agō nê ajamakêtkati nê apa. No pa ixte mê amã mê ate ho apikuprõnh kaxyw mê atã ixihÿx kêt. ⁶ Na htem piitã ã hamaxpêr anhÿr o pa nê hamaxpêr o:

—Kot ka apur rax nê kamã anhō rax nê. Nom kot ka apur grire nê kamã anhō grire.

Anhÿr o hamaxpêr jakamã kêr ka mê apiitã ajamakêtkati nê Jerujarê nhō xwÿnhjê mã kàxpore nhōr mex nê. Kêr ka mê ho apikuprõnh pa nhũm rax nê. Te mēhō ihpur rax nê kamã õ raxta pyrāk. Kê Tirtũm ã mê ate amnhĩ nhĩpêx anhÿr ã mê apumu nê nhÿrmã mê ato mex nê. ⁷ Nom kêr ka mê anhōxÿ kamã mê kãm òr kêt nê. Mē pahte pahkĩnh kãm panhōxÿ hkêt kãm mê kêp amrakati xwÿnhjê mã mēmoj nhōr o papaja na Tirtũm kãm hprãm. ⁸⁻⁹ Kojã mê hã mê apumu hãmri nê amnhĩm mê amex ã mê ajarēnh rãhã ho pa. Mē kãm Tirtũm kĩnh xwÿnhjaja na htem àmnhĩx ri mê kêp amrakati xwÿnhjê mã mēmoj nhōr o pa. Te Tirtũm kot amnhĩ nhĩpêx pyrāk. Na hte àmnhĩx ri mê pamã mēmoj nhōr o pa. Mē pahwÿr na rē nhũm wrÿ. Nhũm mê pamã mê paxàpkur xà nhōr o pa. Nê tanhmã mê pahto pu mê paxà hkêt nê pajamakêtkati nê paxàpēnh o papa. Nê pamex nê ri papa. Panhō rũnh nê ri papa. Jakamã kwa pu mê urāk nê paxàmnhĩx ri mê kêp amrakati xwÿnhjê mã mēmoj nhōr o papa.

¹⁰ E pa ixprĩ hã mê amã ja jarê ka mê inhma. Nà

na hte ã Tĩrtũm mẽ pamã mẽ paxàpkur xà nhõr o pa anẽ. Kot kaj apur kãm ahkre nhũm tanhmã amã mẽmo hyta nhĩpêx to nhũm amã hapôx mex nẽ amã ô rũnh nẽ ka anhõ rax nẽ. Nẽ hkwỳ ho axàpkur o apa nẽ axte hkwỳ hkre. Tã kêr ka mẽ ã Tĩrtũm kot mẽ ato mex anhỹr ã amnhĩ pumu hãmri nẽ urak nẽ axàmnhĩx ri mẽ kêp amrakati xwỳnhjê mã axàmnhõr pẽ mẽ ho mex o ri apa. Nhũm Tĩrtũm mẽ hã mẽ apumu nẽ mẽ amã mẽmoj nhõr rãhã nẽ. Ka mẽ amnhĩ pyrà nẽ mẽ kêp amrakati xwỳnhjê mã hkwỳ nhõr o apa. ¹¹ Koja Tĩrtũm mẽ ato mex rax nẽ ka mẽ anhõ mẽmoj rax nẽ. Ja o amnhĩ xwar mẽ kêp amrakati xwỳnhjê kaxyw kàxpore hkwỳ jaxwỳ. Kêr pa mẽ amã hkwỳ jamỳ nẽ ma Tĩrtũm kôt mẽ pahkwỳjê mã o mō nẽ mẽ kãm kugō kê mẽ omu nẽ hkĩnh nẽ. Nẽ mẽ atã Tĩrtũm mã mex o mex ã harẽ. ¹² Hãmri nẽ mẽ akukwak ri mex nẽ ri pa. Nẽ axpẽn mã Tĩrtũm mex o mex ã harẽn o ri pa. ¹³ Koja mẽ amnhĩ tã mẽ apumu nẽ hkĩnh nẽ. Hãmri nẽ Tĩrtũm mã amnhĩ tã tanhmã mẽ ajarẽnh to nẽ kãm:

—Pa Tĩrtũm. Nà ãm hãmri na pre Korît kãm akôt mẽ ixkwỳjaja amnhĩ jarẽ. Na htem akôt pix mã amnhĩ nhĩpêx mex o ri pa. Jao mẽ ixpê õxỳ hkêt nẽ mẽ inhmã kàxpore hkwỳ nhõr rax nẽ. àmnhĩx ri hamakêtkati nẽ mẽ inhmã hkwỳ nhõr rax nẽ. No ãm mẽ papxipix na htem ã mẽ inhĩpêx anhỹr kêt nẽ. Na htem mẽ kêp amrakati xwỳnh piitã ã mẽ hipêx anhỹr o pa. ãm hãmri na ka pre tanhmã mẽ hkrã hto nhũm mẽ anhỹ hã ã amnhĩ nhĩpêx anhỹr o pa. Amex o amex Tĩrtũm. Anẽ.

¹⁴ Hãmri nẽ mẽ ato hwỳr o:

—Pa Tĩrtũm. ãm hãmri na hte Korît nhõ xwỳnhjaja amnhĩ pyrà nẽ mẽmoj to mẽ ixkutã no-

jarêť o pa. Jakamã aa mẽ ixte amnhĩ tã mẽ inhno ho mẽ omunh kêt tã mẽ inhmã mẽ hkĩnh nẽ. Kwa kêr ka mẽ ixtã mẽmoj to mẽ kutã anojarêť rãhã ho apa Tĩrtũm.

Anhỹr o mẽ ato kuwỳ. ¹⁵ Tĩrtũmja mex o mex. Nom na hte mẽ pahto mex pẽ mẽ pamã kãxpore nhõr kêt nẽ. Kra Jejusja na pre mẽ pamã kugõ. Kãm mẽ pajapê ho mẽ pahwỳr kumẽ nhũm mẽ pahwỳr wrỳ nẽ mẽ pahpiitã mẽ pahte amnhĩ tomnuj pãnhã amnhĩrer kaxyw mẽ panê ty. Ja na mex o kot mẽ pamã kãxpore nhõr jakrenh. Mẽhõ koja uràk nẽ ã mẽ panê htyk anẽ? Nà amrakati ho amrakati. ãm Jejus pix na pre ã amnhĩ nhĩpêx anẽ.

10

Pawre kêp Tĩrtũm Karõ nhỹ hã kapêr xwỳnh ã harênh

Epes 6.10-20; Wam Tesarõn 5.8

¹ E Kris kôt ixkwỳjaja. Nà ixpê Pawre kot paj mẽ akwỳ kot tanhmã ixto kapêr to xwỳnhjê mã amnhĩ jarê ka mẽ apiitã inhma. Nà na hte Kris mẽ pakamã gryk tokyx anhỹr kêt nẽ. Na hte mẽ pahto mex japjê nẽ. Tã inhmã uràk nẽ ã mẽ anhĩpêx anhỹr prãm nẽ. No na hte mẽ akwỳjaja axpẽn mã tanhmã ixto kapêr punuj to nẽ ri axpẽn mã:

—Pawre na hte nhỹri krĩ kamã pa nẽ mẽ pamã kagã nhĩpêx nẽ mẽ pahwỳr kurẽ nẽ kamã mẽmoj tã mẽ pamã kapêr kãm hihtỳx nẽ hã mẽ pamã akir. Tã amnẽ mẽ pahwỳr mõ hãmri nẽ te kãm mẽ pahpyma pyràk o mẽ pamã kapêr o pa.

Anhỹr o ijarê. ² Nom inhmã mẽ awỳr inhmõr nẽ mẽmoj tã mẽ amã ixàkjêr prãm kêt tã kot paj nhỹrmã mẽ awỳr mõ ka mẽ tanhmã amnhĩ tomnuj

to ho apa japêr. Pa ja hã mẽ apumu nê hã mẽ amã akir kãm ga. ³ Na pa htem jar pika ja kamã Tĩrtũm kwỳ hkêt xwỳnhjê kaêx ã ri ixpa nom mẽ uràk nê amnhĩ krã hkôt tanhmã amnhĩ nhĩpêx to ho ixpa hkêt nê. Nê mẽ uràk nê amnhĩ krã hkôt tanhmã ijamaxpêr to ho ixpa hkêt nê. Na pa htem Tĩrtũm Karõ nhỹ hã àhpumunh xà ho amnhĩ nhĩpêx o ri ixpa. ⁴ Nê Tĩrtũm xàhpumunh tỳx xà ho mẽ kãm kapêr jarênh o ri ixpa. Mẽ kot mar nê hkôt amnhĩ nhĩpêx kaxyw. Nê àhpumunh tỳx o na pa htem mẽ kot Tĩrtũm kôt amnhĩ xunhwỳr pymaj mẽ kêp àmnàr xwỳnhjaja tanhmã mẽ nê mẽ ho. ⁵ Na htem htỳx ri tanhmã Tĩrtũm nê hkwỳjê mã kapêr to ho pa. Amnhĩ kaxyw hkôt mẽ hamaxpêr kêt kaxyw tanhmã nê mẽ kãm kapêr to. Na pa htem ja hã mẽ omu nê Tĩrtũm xàhpumunh tỳx xà ho tanhmã mẽ kãm ixkapêr to nhũm mẽ tee ri inhma nê axte mẽ kêp àmnàr kêt nê. Pa mẽ kãm Tĩrtũm kapêr jarê nhũm mẽ ohtô nê kuma nê Kris kôt amnhĩ xunhwỳ nê hkôt amnhĩ nhĩpêx o pa. ⁶ Tã mẽ kajaja kot kaj mẽ Tĩrtũm kôt amnhĩ nhĩpêx mex tã mẽ atõ ra kapêr nhĩrôp xa nê tanhmã amnhĩ tomnuj to. Pa ja hã apumu rỳ hã ajarênh ma nê hã amã akir. ⁷ Mẽ ate Tĩrtũm kot mẽ awỳr inhmênh kêt ã axpên mã ijarênh tã kot kaj mẽ atõ ãm hãmri apê Kris kwỳ hã amnhĩ pumu nê ra mãânên pa ixpê hkwỳ hã ixpumunh kurê kumrêx. Mẽ apyrà nê ixpê hkwỳ kênã. ⁸ Na pa pre ma mẽ awỳr mõi nê tanhmã mẽ amã amnhĩ jarênh to nê mẽ amã:

—Tĩrtũm na pre mẽ awỳr inhmê pa mõi. Ixte ỹ hã mẽ amã kapêr jarênh o ri mẽ akôt ixpa kaxyw. Anê.

Tã pa hte arĩ ã amnhĩ jarênh anhỹr o ri ixpa.

Ãm hãmri na pre Tĩrtũm mẽ awỳr inhmẽ pa hte ãm hãmri mẽ amã kapẽr jarẽnh o ri mẽ akõt ixpa. Na pa hte Tĩrtũm nhỹ hã mẽ amã ixkapẽr nẽ kapẽr o ixêx o amnhĩ to jarkrar kêt nẽ. Ixte tanhmã mẽ atomnuj to ho ri ixpa kaxyw na pre Tĩrtũm mẽ awỳr inhmẽnh kêt. Mẽ amã ixkapẽr mex nhũm mẽ ate inhmar nẽ Kris kapẽr kõt amnhĩ nhĩpêx mex o apa kaxyw na pre mẽ awỳr inhmẽ. ⁹ E kwa Kris kõt ixkwỳjaja. Na pa hte mẽ amã ixpuma kaxyw mẽ awỳr kagà rẽnh kêt nẽ. Mẽ ate kamã harẽnh nẽ tee ri amnhĩ kukamã ajamaxpẽr o amnhĩ kamã amã ma kaxyw kêt. ¹⁰ Mẽ akamã mẽ kãm ixkĩnh kêt xwỳnhjaja na htem ijarẽnh o:

—Pawre na hte awry hã pa nẽ mẽ pahwỳr kagà rẽnh nẽ kamã te kêp pahi ho amnhĩ nhĩpêx pyrà nẽ mẽmoj tã mẽ pamã kapẽr kãm hihtỳx nẽ. Tã mẽ pahwỳr pøj hãmri nẽ kapẽr kaxyw nom kapẽr kãm hihtỳx o kapẽr kêt nẽ. Jakamã mo kaxyw kot puj mẽ hwỳr mra nẽ kapẽr ma?

Anhỹr o ijarẽ. ¹¹ Nom ã ixte anhỹr kêt. Kwa mẽ inhma. Kot paj nhỹrmã ma mẽ awỳr mõi hãmri nẽ te kagà ja kamã mẽ amã ixkapẽr pyræk o mẽ amã ixkapẽr nẽ ixkapẽr xihtỳx o mẽ amã ixkapẽr kãm ga.

¹² Na hte mẽ akwỳjaja kot amnhĩ to mex o mẽ ajakrenh ã amnhĩ to jarkrar o ri pa. No ãm amnhĩ krã hkõt pix mã na htem ã ri amnhĩ jarẽnh anẽ. Na hte Tĩrtũm ã mẽ harẽnh anhỹr kêt nẽ. ¹³ Tã inhmã mẽ uræk nẽ ã amnhĩ jarẽnh anhỹr prãm kêt. ãm ixte Tĩrtũm kot tanhmã inhmã karõ hto xà hkõt amnhĩ nhĩpêx o ixpaja na inhmã hprãm. Tã mẽ kajaja mẽ awỳr na pre inhmẽ. ¹⁴ Ra kot mẽ awỳr inhmẽnh jakamã ixkumrẽx na pa pre mẽ awỳr mõi

ně mẽ akôt ri mẽ amã tanhmã Kris jarēnh to ho ri ixpa. Tirtũm kãm nhỹhỹm ixpa hprãm xà pix wỳr na inhmã ixpa hprãm.

¹⁵ No kêt mẽ kot amnhĩ krã hkôt htỳx ri Tirtũm kapēr jahkre o mẽ pa xwỳnhjaja na htem nhỹri krĩ kamã mẽ kot Kris kôt amnhĩ xunhwỳr ã mẽ harēnh ma nẽ mẽ hã amnhĩ to jarkrar o ri pa. Te tãm kot mẽ hwỳr mōr nẽ mẽ kãm ujarēnh nhũm mẽ kot mẽ mar xà hkôt Kris kôt amnhĩ xunhwỳr pyràk. Nẽ mẽ hã amnhĩ to jarkrar o:

—E na pa pre ma mẽ hwỳr mō nẽ mẽ kãm Tirtũm kapēr jarē nhũm mẽ inhma nẽ hkôt amnhĩ xunhwỳr kurê kumrēx. Ixkukwak ri na prem ã amnhĩ nhĩpêx anẽ. Anẽ.

Nom ã amnhĩ nhĩpêx anhỹrja ã amnhĩ to hêx. No pa na pa hte ho mẽ uràk kêt nẽ. Koja Tirtũm ma nhỹri krĩ hwỳr ixkwỳjê hō mẽ nhũm ma hwỳr mō nẽ mẽ kãm Kris kapēr jarē. Hãmri nhũm mẽ kuma nẽ Kris kôt amnhĩ xunhwỳ. Pa mẽ harēnh ma nẽ mẽ ỹ hã ixkĩnh nẽ nom pa ixkukwak ri mẽ kot hkôt amnhĩ xunhwỳr ã amnhĩ to jarkrar kêt nẽ. Ixte mẽ hwỳr ixpa nẽ mẽ kãm ixujarēnhre hã kot pa hkêt mẽ hã amnhĩ to jarkrar. ãm Tirtũm kãm nhỹhỹm ixpa hprãm xà pix wỳr na pa hte ixpa nẽ mẽ kãm kapēr jarē. Jakamã kot kaj mẽ nhỹrmã Kris kôt amnhĩ nhĩpêx mex o ri apa pa ja hã mẽ apumu nẽ mẽ are nẽ hpãnhã ma krĩ hō hwỳr Kris kot mẽ hwỳr inhmēnh xà hō hwỳr mō. Ka mẽ ja hã ixto Tirtũm wỳr o apa. ¹⁶ Kot paj mẽ anhō krĩ kamã mẽ piitã mẽ kãm Jejus kapēr jarēnh pa hãmri nẽ hpãnhã ma krĩ hkwỳ hkôt ijapôx o ri ixpa nẽ kamã mẽ kãm harēnh o ri mẽ hkôt ixpa. Kormã aa mẽ

kot mar kêt kumrêx xwÿnhjê mã harênh o ri mẽ hkôt ixpa. Na pa hte ã mẽ hwÿr ixpa nẽ mẽ kãm ixujarênh anẽ. Jakamã nhũm mẽ ja hã ixpumu nẽ mẽ kot Tirtũm kapêr mar xwÿnhjê pix wÿr ixpa hã ijarênh kêt nẽ.

¹⁷ Nẽ Tirtũm kapêr ã kagà htũm kot mẽmoj tã mẽ kot amnhĩ to jarkrar ã harênh kot:

Kêr ka mẽ kamjaja amnhĩ mex ã amnhĩ to jarkrar kêt nẽ. Æm Tirtũm pix mã mãn mex o mex ã harênh o ri ho jarkrar o ri apa. Anẽ.

¹⁸ Kot pu mẽ Tirtũm noo mã amnhĩ to mex ã amnhĩ to jarkrar nẽ ãm amnhĩ to jarkrar kaprÿ. Nom koja Tirtũm tãm ja hã mẽ pahto jarkrar nẽ ãm hãmri mẽ pahte amnhĩ to mex xwÿnh ã pahto jarkrar.

11

Jejus kot mẽ hwÿr mẽ rênh ã amnhĩ to hêx xwÿnhjê jarênh

Matêwre 7.15; Rõmãn 16.17; Karatas 1.6-9; Koroosẽ 2.8; Sikün Pêtre 2.1

¹ E kot paj te mẽ hkrã pipãnh xwÿnh kot htÿx ri amnhĩ jarênh pyræk o tanhmã mẽ amã amnhĩ to jarkrar to. Kwa mẽ inhma nẽ ixkamã agryk kêt nẽ. No mẽ ixkapêr kumrêx mãn ma. ² Inhmã mẽ akĩnh. Te ho Mêpahpãm Tirtũm kãm mẽ akĩnhhta pyræk. Te mẽ apê mẽhõ kukrit kãm my hkĩnh nẽ kot ho mjên prãm xwÿnhhta pyræk. Kãm mẽmyjê piitã mẽ hkĩnh kêt ãm kãm pix kĩnh. Ja pyrà nẽ kêr ka mẽ amã Kris kĩnh o nhãm amã mẽ hkĩnh xwÿnhjê jakre. Te ho mẽhõ ni kot kãm myta pix kĩnh nẽ kãm ho mjên prãm xwÿnhhta pyræk. Ja na pa inhmã hprãm. ³ Ra mẽ amã Kris kĩnh tÿx o apa nẽ hkôt amnhĩ nhĩpêx

mex o ri apa htã nhũm mẽ kot amnhĩ krã hkôt htỳx ri Tĩrtũm kapẽr jahkre ho mẽ pa xwỳnhjaja tee ri ja hã mẽ ajarẽnh ma nẽ axpẽn mã mẽ ajarẽnh o:

—Kwa nà ja mex kêt. Koja mẽ Pawre kapẽr ma nẽ ãm kuma nhũm ja mex nẽ. No mẽ pahkôt mẽ kot amnhĩ nhĩpêxja na mẽ pamã mex. Ja na kêt mẽ pamã mex o mex. Anẽ.

Hãmri nẽ ra kot Kris nê tanhmã mẽ amã hêx to kaxyw. Te amnepê mã kagã kot mẽ panã kot wa pê Ewa mã hêx nhũm kot mar nẽ hkôt amnhĩ nhĩpêxta pyrak. ⁴ Na pa pre ra mẽ awỳr mỗ nẽ mẽ amã tanhmã Jejus jarẽnh to. Nẽ tanhmã mẽ amã Tĩrtũm Karõ jarẽnh to. Nẽ tanhmã wa kot mẽ pahto hkra hto hã mẽ amã wa harê ka prem inhma nẽ mar tỳx nẽ. Tã nhũm ra mẽ kot htỳx ri Tĩrtũm kapẽr jahkre xwỳnhjaja ixpãnhã mẽ awỳr mỗ nẽ Jejus kapẽr kwỳm ri tanhmã mẽ amã ujarẽnh to nẽ mẽ amã harẽnh o hêx rãhã ho pa. Nẽ Tĩrtũm Karõja nhũm mẽ amã tanhmã ho hêx to. Nẽ ixte mẽ amã Tĩrtũm kapẽr jarẽnh kwỳm ri ixpãnhã tanhmã mẽ amã harẽnh to ho pa. Na ka prem mẽ ama nẽ ãm hãmri harẽnh ã hkamnhĩx. Kwa kêt ka mẽ ri mẽ ujarẽnh piitã mar nẽ hkôt amnhĩ nhĩpêx kêt nẽ. Mẽ kot Jejus jarẽnh tã no ãm katàt kôt harẽnh kêt nẽ. ãm ri ho hêx o pa. Ka htem ama nẽ ãm hãmri harẽnh ã hkamnhĩx nẽ mẽ amã mẽ mar prãm nẽ. Mẽ kot mẽ amã harẽnh o hêx o pa htã ka mẽ ama nẽ ra mẽ hkôt amnhĩ nhĩpêx kaxyw. Kwa mẽ ri ã amnhĩ nhĩpêx anhỹr hkêt nẽ. ⁵ Kris kot mẽ awỳr mẽ rẽnh ã mẽ kot amnhĩ jarẽnh tã amnhĩ to hêx. Ka prem ama nẽ ãm hãmri mẽ kot mẽ amã harẽnh ã mẽ hkamnhĩx. Nom na pre Krisja mẽ awỳr mẽ rẽnh kêt nẽ. Kêt pa na pre mẽ awỳr inhmẽ. ⁶ Mẽ

hkĩnhã ixkapêr krór pyràk tã no ãm ixte Tĩrtũm kapêr mar tỳx. Nê kot amnhĩ nhĩpêxja na ixte omunh par. Ra mẽ ate ja hã ixpumunh mex.

⁷ Na pa pre mẽ akôt ri mẽ amã Jejus jarênh o ri ixpa no ãm hpãnhã mẽmoj tã mẽ awỳr o ri ixpa hkêt nê. Xà amarĩ ixte mẽ amã harênh nê hpãnhã mẽmoj tã mẽ awỳr kêtja mẽ apê omnuj? ⁸⁻⁹ Kormã ixte mẽ amã Tĩrtũm kapêr jarênh o ri ixpata ã na pa pre hte tũhã kàxpore ho presija no ãm aa hã mẽ awỳr kêt nê. Jar Masetõn kamã Kris kôt mẽ pahkwỳjaja na prem ixwỳr hkwỳr rênh o pa pa ho ixàpkur xã japrôr o ri mẽ akôt ixpa. Mẽ kumã ixte Tĩrtũm kapêr jarênh o ri ixpa hkêt tã pa hte mẽ kukwak ri mẽ akôt ho ixàpkur o ri ixpa. Tã kot paj arĩ ã mẽ akôt ixpa nê ã amnhĩ nhĩpêx anê nê mẽmoj tã mẽ awỳr o ri ixpa hkêt nê. ¹⁰ Ja inhmã mex. Jakamã kot paj amarĩ mẽ anhõ pika pê Gres kãm ã mẽ amã Tĩrtũm kapêr jarênh o ixpa anê nê mẽmoj tã mẽ awỳr kêt nê. ãm hãmri na pa ã mẽ amã amnhĩ jarênh anê. Kris pyrà nê ixêx kêt kênã. ¹¹ Xà we inhmã mẽ akĩnh kêt kôt na pa hte ã mẽ amã Tĩrtũm kapêr jarênh pãnhã mẽ awỳr kêt anê? Nà inhmã mẽ akĩnh jakamã na pa hte kapêr jarênh pãnhã mẽ awỳr o ri ixpa hkêt nê. Inhmã mẽ akĩnh tỳx kênã. Tĩrtũm kot ja hã ixpumunh mex. ¹² No mẽ kot amnhĩ krã hkôt htỳx ri Tĩrtũm kapêr jahkre xwỳnhjaja na htem mẽ ajahkre hpãnhã kàxpore hã mẽ awỳr pix o pa. Nê mẽ amã tanhmã amnhĩ to hêx to nê mẽ amã:

—Nà mẽ ixte Pawre kot amnhĩ nhĩpêx pyràk. Mẽ ixte amnhĩ nhĩpêxja kot axpên pyràk.

Anhỳr o mẽ amã amnhĩ to hêx. Nom ixte ho

mê uràk kêt kumrêx. Mê ixte amnhĩ nhĩpêx kot axpên pyràk ronhỹx pa mê uràk nê kàxpore hã mê awỳr o ri ixpa. Nom ixte ã amnhĩ nhĩpêx anhỹr kêt. Kot paj aa ã amnhĩ nhĩpêx anhỹr o ixpa hkêt nê. ¹³ ã mê kot amnhĩ nhĩpêx anhỹr xwỳnhjaja na pre Tĩrtũm mê awỳr mê rēnh kêt nê. Mê kot Kris nhỹ hã mê ahkre xwỳnh ã amnhĩ jarēnh tã ãm amnhĩ to hêx. ¹⁴ Mê õ pahi Satanastija te mẽmoj mex jarēnh pyràk tã no ãm na hte mẽ pano kupyw pē mẽ pamã tanhmã hêx to ho mẽ pahkôt pa. Te kot mẽmoj mex ã ãm hãmri kot harēnh pyràk tã no ãm ho hêx. ¹⁵ Tã hkôt mẽ kot amnhĩ nhĩpêx xwỳnhjaja na htem uràk nê te tãm mẽ kot amnhĩ nhĩpêx xwỳnhjê pyrà nê mẽ pahwỳr mra nê tanhmã mẽ pamã hêx to. Satanasti pyrà nê mẽ pano kupyw kaxyw tanhmã mẽ pamã hêx to. Nom koja Tĩrtũm nhỹrmã mẽ pahtã mẽ homnuj tỳx kumrêx nhũm mẽ rĩ amnhĩ pumu.

Tanhmã mẽ kot Kris ã Pawre nhĩpêx to ã mẽ harēnh

Atre 9.23-25

¹⁶ E kot paj axte te ixtỳx ri amnhĩ to jarkrar pyràk o mẽ amã tanhmã amnhĩ jarēnh to ka mẽ inhma nê ixkamã agryk kêt nê. ¹⁷ Pahihti Kris nhỹ hã kot paj mẽ amã amnhĩ jarēnh kêt ãm amnhĩ krã hkôt kot paj mẽ amã amnhĩ jarē. ¹⁸ Na htem ohtô nê mẽ ate mẽ hã apijaàm kaxyw tanhmã mẽ amã amnhĩ to jarkrar to ho pa. Tã kot paj mẽ uràk nê amnhĩ krã hkôt mẽ amã amnhĩ to jarkrar ka mẽ inhma. ¹⁹ Mê ate amnhĩ xàhpumunh tỳx ã amnhĩ jarēnh tã ka htem htỳx ri mẽ kot amnhĩ to jarkrar o ri mẽ pa xwỳnhjê kapēr ma nê mẽ hkôt ajamaxpēr

nê mẽ hkôt amnhĩ nhĩpêx kurê kumrêx. ²⁰ Mẽ kot Kris nhỹ hã mẽ ahkre hã amnhĩ to hêx xwỳnhjaja mẽ pakurom mẽ kot amnhĩ to rax xwỳnh ã amnhĩ jarênh jakamã na htem mẽmoj tâ mẽ amã karô ho pa.

Nê mẽ kãm hprãm xà hkôt nhỹhỹm mẽ arê nê nhỹhỹm mẽ arê.

Nê mẽ apa pix kukwak ri apkur o pa.

Nê mẽmoj tâ mẽ ajakwap mẽ atak o pa.

Ã mẽ kot mẽ anhĩpêx anhỹr tâ ka te mẽ ate atũm kêt pyrà nê atỳx ri mẽ kapêr ma nê mẽ hkôt amnhĩ nhĩpêx o ri apa. ²¹ Tã ixte mẽ uràk nê ã mẽ anhĩpêx anhỹr kêt tâ kot paj mẽ uràk nê mẽ amã tanhmã amnhĩ to jarkrar to ka mẽ inhmar japêr. Te ixtỳx ri amnhĩ jarênh pyràk o kot paj mẽ amã amnhĩ jarê nom ãm hãmri mẽ amã amnhĩ jarê. ²² Mẽ kot Jejus nhỹ hã mẽ ahkre hã amnhĩ to mẽ hêx xwỳnhjaja na htem mẽ amã tanhmã amnhĩ to jarkrar to nê mẽ amã:

—E mẽ inhma. Mẽ ixpê Ijaew na pa mẽ. Mẽ arom mẽ ixpê finat Apraãw kanrêhã htãmnhwỳ jakamã kwa mẽ ixkapêr ma nê mẽ ixkôt amnhĩ nhĩpêx. Anê.

Nom ijaxwỳja ixpê Ijaew tâ pa hte mẽ uràk nê ja hã amnhĩ to jarkrar hkêt nê. ²³ Nê mẽ kot Kris kapêr jarênh mex o pa hã amnhĩ jarênh tâ pa na pa hte harênh mex o mẽ hakre. Te ixkrã pipãnh pyràk o ã mẽ amã amnhĩ jarênh anhỹr tãã.

E pa mẽ amã tanhmã amnhĩ jarênh to ka mẽ inhma. Nà na pre Kris ã mẽ kãm ixkurê xwỳnhjaja mẽ kot amnhĩ to jarkrar xwỳnhjê hkĩnhã Kris ã ixpynênh nê ijagjênh xohtô nê. Nê mẽ hkĩnhã tōhã ixtak rũnh kumrêx. Pa mẽ hkĩnhã xatã mẽ kot

tanhmã ixto hã kritpêṃ ronhỹx pa pre ty. ²⁴ Na pre Ijaew krãhtũmjaja Kris ã ixkatut kãm ixtak rũnh nê. Nê ixtak xàja pĩ hã mry kà janhôr o ixtak. Nê ixtak kaxyw nê ixtak xà jatur xà kamã kàx xwa gixre janhô nê ho ixtak rũnh o ixkatut kà rê. Ixtak o 39 hãmri nê rĩ kormã mẽ kot ixpĩr pymaj inhmã ure. Na pre htem nhỹri ixpynê nê ã inhĩpêx anê. Na prem ã inhĩpêx anhỹr o 5 wês.

²⁵ Nê na prem ra mẽ kot ixpĩr kaxyw nê kên rũnh kwỳ jamỳ nê ho ixtak o kuhê. Nê Rõm nhõ xwỹnhjaja haxwỳja pĩ ho ixtak rax kumrêx. ã inhĩpêx anhỹr o axkrunêpxi.

Nê na pa pre hte gô xujanãr kãm nhỹhỹm Jejus jarênh o ri ixpa kaxyw pàr kãm mẽ hwỳr ixpa nhũm pàrja tanhmã amnhĩ to nê agjê. Kritpêṃ nhỹx pre hte gôja ixpĩ. Pa pre ã amnhĩ nhĩpêx anhỹr o axkrut. Tã arĩgro hõ hã kê axte pàr õ mã axà nê ma axte krĩ hõ hwỳr mõ. Nhũm kê pàrta axte mẽ ixpê axà nhũm gôja nhỹx kê axte ixpĩ. Pa pàr jakà hã kumỳ nê hã ijêt o amỹkry. Nê ho apkati. Tã nhũm nhỹhỹnh pàr õja mõ nhũm kamã mẽ mõr xwỹnhjaja ixpumu nê ixwỳr pàr o mõ nê amnhĩ wỳr ixto api nê ma amnhĩ kôt ixto mõ.

²⁶ Na pa pre amnhĩ xà htỳx kamã ijamak o ri ã mẽ kãm Kris kapêr jarênh o ri ixpa anê. Kironhỹx pre gô tàmja ixpĩ. Nhũm mẽ àhkĩnh nhi xwỹnhjaja kironhỹx prem mããnên ixpĩ. Nê Ijaew nê Ijaew kêt xwỹnhjaja tõhã tanhmã ixtomnuj to ho pa. Pa pre krĩ hkwy hwỳr ixpa rỳ kapôt ã ixpa nhũm mẽ ixtã amỹnê. Pa pre gô xujanãr kãm pàr kãm ri ixpa nê nhỹx kamã ty. Nhũm mẽ kêp Kris kwỳ hã amnhĩ to hêx xwỹnhjaja haxwỳja tanhmã ixtomnuj to pa mẽ

ÿ hã amnhĩ xà htỳx kamã ijamak o ri ixpa. Æ na prem Kris ã inhĩpêx anhỹr o pa.

27 Nê na pa Jejus kapêr jarênh o ri ixpa kurê ixkêngrà nê ri ixpa. Nê tōhã inhôt kêt ã ixtã apkati. Nê tōhã inhmã prãm nê inhmã kôr nê ri ixpa. Nê tōhã ixê mex kêt nê inhmã kry nê ri ixpa. 28 Na pa hte Kris kapêr jarênh o ri ixpa pê ã amnhĩ nhĩpêx anê. Nom ja pix kêt. Na pa hte krĩ piitã hkôt Kris kwỳjê hkukamã tee ri ijamaxpêr nê ijamaxpêr o:

—Hêxta waa nê. Mãn mẽ arĩ Kris kôt amnhĩ nhĩpêx mex japêr rỳ ko. Mãn mẽ ra kapêr kwỳm ri tanhmã amnhĩ tomnuj to rỳ ra hkaga.

Anhỹr o ijamaxpêr o ixpa.

29 Nê na hte mêhō Tĩrtũm kapêr nhĩrôp xa nê tanhmã amnhĩ tomnuj to pa tee ri omu nê ixkaprĩ htỳx kumrêx. Kojã mêhō tanhmã Tĩrtũm nê mêhō mã kapêr to nhũm kuma nê Tĩrtũm kôt amnhĩ nhĩpêx kêt pa tee ri ja hã omu nê nê kêp àmnàr xwỳnhta kamã inhgryk tỳx kumrêx.

30 E Kris kôt ixkwỳjaja. Na pa ã mẽ amã amnhĩ jarênh anê. Te ixte amnhĩ to ijarkrar pyràk no ãm mẽ ate ixirerek xwỳnh ã ixpumunh pix kaxyw.

31 Æm hãmri na pa ã mẽ amã amnhĩ jarênh anê. Ixêx kêt. Pahihti Jejus nhĩpêxà Tĩrtũm kot ja hã ixpumunh mex. Tĩrtũmja mex o mex. Kojã mex o mex tũm nê pa rãhã ho pa. Tãm kot ixirerek ã ixpumunh mex. 32 Kormã krĩ pê Tamas kãm ixpare ri na pre mẽ õ pahi Arêtja mẽ kãm ixtã amỳnê nhũm pōristijaja krĩ hpu hã kahê xà nhō hakwakre piitã kãm hipôk pa nê ixkãm hamak o kuhê. Pa tee inhmã nhỹhỹnh ixkator nê ma mẽ umaj ixprôt nê ixtêm prãm nê ixirerek xwỳnh ã

amnhĩ pumunh kurê kumrêx. ³³Tã nhũm Kris kôt mẽ pahkwỳjaja hamaxpěr nẽ kawà rax mỳ nẽ o tẽ nẽ inhmã ãm pa hwỳr axà nẽ kamã nhỹ. Hãmri nhũm mẽ pàr nhõr o kahê nhĩrô pẽ ixto wrỳ pa ixkato nẽ mẽ kêp amũxu nẽ amnhĩm ixprĩ nẽ ma tẽ nẽ mẽ kêp akunok. ã na pre Tĩrtũm ixirerek xwỳnh ã inhmã ixto amnhĩrĩt anẽ.

12

Tĩrtũm kot Pawre mã mẽmoj to amnhĩrĩt ã harẽnh

¹ E Kris kôt ixkwỳjaja. Nà inhmã amnhĩ to jarkrar hprãm kêt tã kot paj tanhmã mẽ amã amnhĩ jarẽnh to ka mẽ inhma nẽ hã ixtã apijaàm japêr. Na hte Tĩrtũm tõhã inhõt kãm ixkarõ mã tanhmã kapêr to. ²⁻³ Amnepê mã amgrà hõ hã na pre tanhmã ixkrã hto nẽ õ krĩ hwỳr amnhĩ wỳr ixto api. Na pre ra hã amgrà pẽ 14 ãn. Apu inhĩ rãhã ixto api rỳ apu ãm ixkarõ pix o api rỳ ko. Ixte ja hã amnhĩ pumunh mex kêt. Tĩrtũm pix kot ja hã ixpumunh. ⁴ Na pre ixto api pa pøj nẽ õ krĩ kamã axtem tanhmã mẽ kapêr to hã mẽ kuma. Na prem mẽmoj mex kumrêx jarẽ pa kuma nẽ ixkĩnh nẽ. Nẽ inhmã mar prãm nẽ. Hãmri nẽ ijamaxpěr o:

—Hêxta waa nẽ. Mẽmoj jarẽnhja mex kumrêx. Nà kot paj akupỹm wrỳ nẽ ixkwỳjê mã harẽ kê mẽ ixpyrà nẽ kuma. Nà kot paj anẽ.

Anhỹr tã nhũm Tĩrtũm Karõ ja nê ixkurê nẽ inhmã:

—Nà kêr ka mẽ kãm ja jarẽnh kêt nẽ. ãm kapxipix kot kaj ama nẽ ri hã apa.

⁵ Anhỹr jakamã pa pre paxipix mẽ arom mẽmojja pumu nẽ kuma nom kot paj ri hã amnhĩ to jarkrar

kêt nê. Kot paj âm Jejus pix tanhmã harênh to ho ri ixpa. Jao ixrom mex o mex ã harê. Nê ixrom hihtýx o hihtýx nê àhpumunh o àhpumunh ã harênh o ri ixpa.

⁶ Nê ixte Tirtûm nhõ krî hwýr ixàpirja âm hãmri ixte hã amnhî jarênh tã kot paj ja hã amnhî to jarkrar o ri ixpa hkêt nê. Mê ate ja hã inhmar kôt inhmex ã ijarênhja na inhmã hprãm kêt. Nom kot ka mê ixte tãm amnhî nhîpêx ã ixpumu nê tãm ixkapêr ã inhma hãmri nê rî kormã inhmã inhmex ã ijarê. ã mê ate amnhî nhîpêx anhýrja na inhmã hprãm. ⁷ Na pre Tirtûm inhôt kãm inhmã mêmoj mex kwý jarênh rax nê. Hãmri nê hpãnhã inhmã:

—E na ka akwýjê rom inhõ krî hwýr api nê mê kurom mêmoj mex pumunh rax nê. Tã ate ja hã amnhî pumunh nê ma mê kãm hã amnhî to jarkrar o ri apa pymaj kot paj Satanasti mã anê nhũm inhma nê tanhmã atomnuj to ho pa. Nom ijamaxpêr xà hkôt koja ã anhîpêx anê.

Anhýr jakamã nhũm tanhmã inhîpêx to pa inhmex kêt nê ixpa. Te mrônhî rax nhýhýnh kot ixkamnhwýr nhũm inhmã tee ri hkaxàr prãm kaprý nê ý hã ho inhgjêx rãhã nê ixpaja pyræk. ⁸ Tã pa tee ri ja hã amnhî pumu nê amnhî to Jejus wý nê kãm:

—Kwa Pahihti. Na pa ra mêmojta nhý hã ixpunuj nê ixirerek nê ixpa. Kwa inhnê ata pa akupým ixihtýx nê ijamakêtkati nê ri ixpa nà?

Anhýr o amnhî to hwýr o axkrunêpxi. ⁹ Hãmri nhũm inhmã:

—Nà kot paj anê hyr kêt nê. Kot paj âm akutã inhnojarêt rãhã ho ri akôt ixpa. Ka axirerek nê apa

htã ixihyt̃x xwỳnh ã ixpumunh kôt ixkamnàr rom tanhmã inhỹ hã amnhĩ nhĩpêx to ho ri apa. Anẽ.

Ã inhmã kapêr anhỹr jakamã na pa ixpunuj nẽ ri inhĩrot nẽ ixpa htã ixrom hiht̃x xwỳnhhta nhỹ hã ixkĩnh nẽ ixpa. Nẽ kurom ixirerek xwỳnh pix ã amnhĩ to jarkrar o ri ixpa. ¹⁰ Jakamã kot paj Kris ã ixpunuj nẽ ri ixpa htã ixkĩnh nẽ ijamakêtkati nẽ ri ixpa. Kwãr mẽ mãmri hã tanhmã ixto kapêr to nẽ tanhmã hã inhĩpêx to pa amnhĩ xà ht̃x kamã ijamak o ri ixpa. Nẽ ixpê amrakati nẽ inhĩrot nẽ ri ixpa htã Kris nhỹ hã tanhmã kãm amnhĩ nhĩpêx mex to rãhã ho ri ixpa.

Pawre kot tee ri mẽ hkukamã hamaxpêr ã harênh

¹¹ Tã mẽmo kaxyw na pa ã mẽ amã amnhĩ jarênh anê? Nà mẽ ate ixtã apijaàm kêt jakamã na pa ã mẽ amã amnhĩ jarênh anê. Mẽ kêp Kris nhỹ hã mẽ ajahkre xwỳnh ã amnhĩ to hêx xwỳnhjaja na ka htem ixrom kot amnhĩ to rũnh xwỳnh ã mẽ harê nẽ mẽ hã apijaàm o ri apa. Nom ixte amnhĩ to grire xwỳnh tã mẽ kot amnhĩ to rũnh o ijakrenh kêt. ¹² Na pa pre mẽ akamã ri ixpa nẽ Tĩrtũm nhỹ hã aa mẽ ate mẽmoj pumunh kêt kwỳ ho anhỹr rax o ri mẽ akôt ixpa. Nẽ ỹ hã akupỹm mẽ à xwỳnhjê ho mex. Nẽ mẽ nohkre xwỳnhjê no ho mex. Na pa pre hte ã mẽ amã mẽmoj nhĩpêx anhỹr o ri mẽ akôt ixpa. Amnhĩ xà ht̃x kamã ijamak o ri ixpa htã Tĩrtũm xiht̃x xà ho amnhĩ to ht̃x nẽ ã mẽ amã mẽmoj to anhỹr o ri mẽ akôt ixpa. Mẽ ate omunh nẽ Tĩrtũm àhpumunh t̃x ã omunh kurê kumrêx kaxyw. Nẽ ixpê Kris nhỹ hã mẽ ajahkre hã ixpumunh kurê kumrêx kaxyw na pa pre ã mẽ amã amnhĩ nhĩpêx anhỹr o ri mẽ akôt ixpa. ¹³ Xàn

pa pre nhãm krĩ hkwy kamã Kris kôt mẽ pahkwýjê ho mex tã mẽ kajaja tanhmã mẽ ato mex to hkêt nê? Nà na pa pre hte mẽ anhĩpêx o axpên pyræk. ãm mẽmoj pixire na pa pre mẽ uræk nê mẽ awýr kêt nê. Nhãm krĩ hkwy kamã ixpata ã na pa pre mẽmoj to presija nhũm prem inhmã òr o pa. Tã pa pre mẽ mō nê mẽ akôt ixpa nê mẽmoj to presija htã hã mẽ awýr kêt nê. Kwa mẽ ã ixte amnhĩ jarênh anhýrja ma nê ixkamã agryk kêt nê.

¹⁴ Tã ot pa ra akupým mẽ awýr inhnojarêt kaxyw. Na pa pre ra mẽ awýr inhmõr o axkrut. Tã ra axte mẽ awýr inhnojarêt kaxyw. Kot paj mẽ awýr mō nê mẽ akôt ixpa nom te wam ixtêmta pyrà nê mẽmoj tã ri mẽ awýr kêt nê. ãm mẽ amã ixkĩnh pix na inhmã hprãm. Mẽ apiitã te mẽ apê ixkra pyræk. Na hte mẽ hkrarejaja mẽ katorxà nê mẽ hipêêxà mã ujaaprôr o pa hkêt nê. Mẽ hipêêxà nê mẽ katorxà na hte hkrare mã kot mẽmoj to presija xà hkôt kãm haprôr o pa nom mẽmoj tã hwýr kêt nê. Ja pyrà nê kot paj mẽ apê ixkra pyræk ã mẽmoj tã mẽ awýr kêt nê. ¹⁵ Kot kaj mẽ mẽmoj to presija japêr nê inhmã harê pa ixàmnhĩx ixkĩnh kãm mẽ amã ixkàxpore piitã òr par pyræk o amnhĩ nhĩpêx. Nê mẽ amã tanhmã amnhĩ nhĩpêx to ho ixpa rãhã ixykja na inhmã hprãm. Inhmã mẽ akĩnh tỳx kumrêx tã mẽ kajaja mẽ amã ixkĩnhja mẽ atã hkwy jêt kêt kumrêx. ¹⁶ Ixte amnhĩ mã mẽmoj tã mẽ awýr kêt tã na hte mẽ akwýjaja ixêx rom ixte nhãm mẽ kêp amrakati xwýnhjê mã kàxpore hã mẽ awýr o ixpa hã ixkamnhĩx.

¹⁷ Kwa tanhmã na pa pre ri mẽ ano kupyw to? Xà ja kaxyw na pa pre mẽ awýr ixkràmnhwýta wa

kumê? ¹⁸ Na pa pre Xitre hã ixihyt̃x nê mẽ awỳr kumê. Nê Kris kôt mẽ pahtõja pa Xitre hkôt kumê nhũm wa ma mẽ awỳr mõi. Tã xà na pre Xitre tanhmã mẽ ano kupyrr to? Nà na pre ã mẽ anhĩpêx anhỳr kêt nê. Tã wa ixte amnhĩ nhĩpêx nê wa ijamaxpêrja kot axpên pyràk. Nà na pa hte uràk nê mẽ ano kupyrr o ri ixpa hkêt nê. ¹⁹ Mãn ka mẽ axpên mã mẽ ijarênh o:

—Nà Pawre mẽ hkwyjaja mẽ kãm amnhĩ to rũnh xwỳnh prãm jakamã na ã Pawre kagàja kamã mẽ pamã amnhĩ tã àprãr anê.

Anhỳr o mẽ ijarênh japêr nom mẽ inhmã amnhĩ tã tanhmã ixàprãr to hprãm kêt. ãm mẽ inhmã mẽ akĩnh nê mẽ ato mex prãm jakamã na pa htem tanhmã mẽ amã amnhĩ nhĩpêx to ho ri ixpa. Na pa Tĩrtũm noo mã Kris nhỹ hã ã mẽ amã mẽ amnhĩ jarênh anê.

²⁰ Tã kot paj jatã ma mẽ awỳr mõi ka mẽ akwyjaja tanhmã amnhĩ tomnuj to japêr.

Mẽmoj tã axpên mã axàkjêr o apa.

Rỳ mẽmoj tã axpên kãm agryk.

Rỳ axpên kãm agryk tokyx anhỳr o apa.

Rỳ axpên pê anhõxy.

Rỳ axpên to akapêr punuj o apa.

Rỳ mẽ ajakwa kamã nhãm mẽ hixi ho rêr o ri apa.

Rỳ amnhĩ to rũnh prãm xàj anhmã amnhĩ nhĩpêx to ho apa.

Kot kaj mẽ ã amnhĩ nhĩpêx anhỳr o ri apa pa ja hã mẽ apumu nê ixkaprĩ htỳx kumrêx ka mẽ tee ri amnhĩ tã ixpumu. ²¹ Xà kot paj mẽ awỳr mõi nê mẽ apumu ka mẽ akwyjaja arĩ mẽ aprõ kuhpa hã nhãm mênijê ho amnhĩkati ho ri apa? Rỳ arĩ

tanhmã ajamaxpêr punuj to ho apa? Rỳ atỳx ri apijaàm kêt o apa? Kot ka mẽ arĩ ã amnhĩ nhĩpêx anê pa ja hã mẽ apumu nê ixkaprĩ xàj inhmỳr rax nê. Nê mẽ anhỳ hã Tĩrtũm noo mã ixpijaàm tỳx kumrêx.

13

Pawre kot tanhmã amnhĩ kukamã mẽ kãm karõ hto

¹ Tĩrtũm kapêr ã kagà htũm tanhmã mẽ kot amnhĩ tomnuj to xwỳnhjê jarênh kot:

Koja mễhõ tanhmã amnhĩ tomnuj to nhũm mễhõ pyxi nê ã amnhĩ nhĩpêx anhỳr ã omu nê awỳr tễ nê amã harê ka mẽ ama nê ãm ama nê hkôt ajamaxpêr kêt nê. No koja mẽmojaja axkrut rỳ axkrunêpxi nê hã omu nê awỳr mra nê axpên kôt amã harê ka mẽ ama nê mẽ hkôt ajamaxpêr kurê kumrêx. Anê.

Tã ra mẽ awỳr inhmõr o axkrut tã kot paj akupỳm mẽ awỳr mỗ nê mẽ apumu. ² Hapu hã mẽ awỳr inhmõrta ã na pa pre mẽ akwỳ kot tanhmã amnhĩ tomnuj to hã mẽ omu nê hã mẽ kãm akir nê mẽ kãm:

—Kot kaj mẽ amnhĩ tomnuj kaga nê tãm amnhĩ nhĩpêx kêt kot paj nhỹrmã akupỳn mẽ awỳr mỗ nê ã mẽ ate amnhĩ nhĩpêx anhỳr ã mẽ apumu nê hã mẽ atomnuj tỳx kumrêx kãm ga. Anê.

Jakamã kot paj mẽ ma mẽ awỳr mỗ nhũm mẽ akwỳjaja arĩ mẽ ate amnhĩ tomnuj o apa hã inhmã mẽ ajarê pa mẽ atã mẽ kuma nê tanhmã mẽ ato htỳx nê. ³ Kot kaj mẽ ja hã ixpumu nê aprĩ hã ixte Kris nhỹ hã ixkapêr xwỳnh ã ixpumunh tỳx kurê kumrêx. Kris ixrom hihtỳx o hihtỳx. Na pre

ra mẽ ate amnhĩ tomnuj o apata mỳrapê tanhmã mẽ anhĩpêx to. Tã kot kaj mẽ kormã ã ate amnhĩ nhĩpêx anhỹrja kaga hkêhã hã koja tee ri ja hã mẽ apumu nê mẽ anhĩpêx kati nê. ⁴ Amnepêm na pre Krisja te hihtỳx kêt pyrà nê ãm arĩ mẽ kãm xa nhũm mẽ unê nê pĩ kahpa ã kunhõ nê kupĩ. Tã nhũm Tĩrtũmja àhpumunh tỳx o akupỹm ho htĩr nhũm akupỹm htĩr o htĩr nê Tĩrtũm nhỹ hã hihtỳx o hihtỳx ã amnhĩ to amnhĩrĩt. Ja pyrà nê wam mẽ awỳr inhmõrta ã na pa pre hte mẽ akamã te Kris kormã htyk kêt ri hihtỳx kêêta pyrà nê mẽ akõt ixpa. Tã kot paj ma akupỹm mẽ awỳr mõ hãmri nê te Kris ra akupỹm htĩr nê hihtỳx o hihtỳxta pyrà nê Tĩrtũm xihtỳx xà ho tanhmã mẽ kot amnhĩ tomnuj xwỳnhjê nhĩpêx to. Hãmri nhũm mẽ amnhĩ tã ixpumu nê Tĩrtũm nhỹ hã ijamaxpêr tỳx ã ixpumunh kurê kumrêx.

⁵ Kwa mẽ aprĩ hã tanhmã mẽ ate amnhĩ nhĩpêx to hã amnhĩ pumu. Xàn ka htem ãm hãmri amnhĩ kaxyw Jejus Kris kõt ajamaxpêr o ri apa nà? Kot kaj mẽ apê hkwy hã koja mẽ akaxwỳnh kãm mẽ akamã hkrĩ rãhã nê. Nom koja mẽ akaxwỳnh kãm mẽ akamã hkrĩ hkêhã ka mẽ ãm apê hkwy hã amnhĩ jarênh kaprỳ. ⁶ No pa na ixte ja hã amnhĩ pumunh mex. Ixpê Jejus kwỳ na pa. Ra ixkamã hkrĩ nê ixkõt pa ho pa jakamã ixpê hkwy na pa. Tã mẽ ate ja hã ixpumunh mexja na inhmã hprãm. Na pa hte ixpê Jejus kwỳ hã amnhĩ jarênh kaprỳ hkêhã nê.

⁷ Nê na pa hte mẽ ato tanhmã Tĩrtũm wỳr to ho ri ixpa nê mẽ ato hwỳr o:

–Pa Tĩrtũm. Kwa tanhmã Korît nhõ xwỳnhjê hkrã hto kê mẽ tanhmã amnhĩ tomnuj to ho pa

hkêt nê.

Anhÿr o mẽ ato kuwỳ. Mẽmo kaxyw na pa hte ã mẽ ato hwỳr anê? Ixte mẽ ajahkre mex ã amnhĩ to amnhĩrĩt kaxyw kêt. ãm mẽ ate amnhĩ to mex rãhã ho ri apa kaxyw. Kot kaj mẽ ã amnhĩ nhĩpêx anhÿr o ri apa hãmri nhũm axtem mēhõ mẽ awỳr mōn pōj nê tanhmã mẽ amã mẽ ijarēnh to nê mẽ ijarēnh o:

—Kwa Pawre mẽ hkwỳjaja na htem Tĩrtũm kapēr kwỳm ri Korìt nhõ xwỳnhjê jahkre ho pa.

Anhÿr tã pa amnhĩ tã mẽ kuma nê ãm mẽ kuma. ⁸Na pa hte Tĩrtũm kapēr kutã amnhĩ xunhwỳr kêt nê. Na pa hte ãm mẽ ate hkôt amnhĩ nhĩpêx o ri apa hã mẽ amã karõ kamã ixihtỳx rãhã ho ri mẽ akôt ixpa. ⁹Jakamã kot kaj mẽ hkôt amnhĩ nhĩpêx mex o apa pa ja hã mẽ apumu nê ixkĩnh nê. Mẽ kot axpēn mã ixirerek ã ijarēnh o pa htãã. ã mẽ ate amnhĩ nhĩpêx anhÿr o apa kaxyw na pa hte mẽ ato Tĩrtũm wỳr o ri ixpa nê kãm:

—Pa Tĩrtũm. Kwa tanhmã Korìt nhõ xwỳnhjê hkrã hto kê mẽ kot amnhĩ tomnuj kaga hpa nê hpãnhã akapēr kôt pix mã mãn amnhĩ nhĩpêx rãhã nê. Anê.

¹⁰Tã pa kormã mẽ awỳr inhmōr xwỳj ri ã amnhĩ kukamã kagã nhĩpêx nê mẽnh anê. Mẽ ate kamã harēnh nê mar nê tokyx akupỳm tãm amnhĩ nhĩpêx kaxyw. Kot pa mẽ awỳr mō nê Pahihti nhỹ hã mẽ ate amnhĩ tomnuj ã mẽ amã akir. Nom inhmã ã mẽmoj tã mẽ amã ixàkjêr anhÿr prãm kêt. ãm ÿ hã kapēr o mẽ ajahkre mex nhũm mẽ ate inhmar nê hkôt amnhĩ nhĩpêx rãhã ho apaja na inhmã hprãm.

¹¹E Kris kôt ixkwỳjaja. ãm ja pix. Kwa kêr ka mẽ ixkapēr mar tỳx nê hkôt amnhĩ nhĩpêx mex nê. Nê

Tĩrtũm kôt pix mã ri tanhmã amnhĩ nhĩpêx to ho apa rãhã ho apa. Nẽ tãm ri amnhĩ nhĩpêx. Nẽ axpẽn kôt ajamakêtkati nẽ akĩnh nẽ axãmnhĩx ri apa. Kot kaj mẽ ã amnhĩ nhĩpêx anhỹr o apa nhũm Tĩrtũm mẽ akôt pa ho pa. Kãm mẽ pajapê htỳx kumrêx. Kêp mẽ pamã mẽ pahkĩnh nẽ mẽ pajamakêtkati jagjênh xwỳnh.

¹²⁻¹⁴ Nẽ ota jar Kris kôt mẽ pahkwỳjaja pa mẽ ixpimràatã mẽ awỳr ixpêr mẽ. Mẽ ixpiitã mẽ inhmã mẽ akĩnh tỳx jakamã na pa mẽ awỳr ixpêr mẽ.

Nẽ kê Pahihti Jejus Kris mẽmoj to mẽ akutã nojarêr rãhã ho pa. Nhũm Tĩrtũm arĩ kãm mẽ ajapê rãhã ho pa. Nhũm Karõ tanhmã mẽ akrã hto ka mẽ axpẽn to mex pix kukamã mãn ajamaxpêr o apa.

Tã e ixkwỳjaja. ãm ja pix. Ixpê Pawre na pa mẽ awỳr kagàja nhĩpêx nẽ ã mẽnh anẽ.

Tĩrtũm kapēr ã kagà nyw
New Testament in Apinayé (BR:apn:Apinayé)

copyright © 1999 Wycliffe Bible Translators, Inc.

Language: Apinayé

Translation by: Wycliffe Bible Translators, Inc.

Apinayé [apn], Brazil

Copyright Information

© 1999, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Apinayé

© 1999, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-21

PDF generated using Haiola and XeLaTeX on 21 Feb 2024 from source files
dated 29 Jan 2022

383a4e22-34cd-505f-9cc2-2f9921e7aa9f